



五

校禮堂集

詩上



凌次仲先生著

校禮堂詩集

凌次仲先生校禮堂詩集題詞

宣城張炯惺齋

避熱就冷官陽坡種茶久同出蘇齋門遇我一何厚禮

經善校讐釋例細為剖茹古醇乎醇直接康成後維時

阮中丞秉筆誠非偶煌煌傳儒林棟戴震同不朽餘

事拈霜毫溯自卯及酉無黨與有鄰贈詩列堂右詩篇大定

劉無黨書法開元蔡有鄰先生贈句 倏焉騎鯨遊人求遺草否吾宗有通

儒裴伯廣所業辦香守師傳獨寶之以心不以口攜篋千

里行匹馬黃河走歸來擇梨棗匠氏勞雙肘近復索題

詩好我忘老醜更聞手澤多頡頏漢儒有何當布寰區

羽翼魯中叟春江生晚潮夜月伴南斗公乎其鑒茲願

張炯惺齋

登謝祿山觀海 并序

丙申

牛墩河

古佛寺大松歌

雨中遲章酌亭不至戲作長句柬之

游崇真觀同酌亭作 送吳牖雲

送程時齋游關中 二十生日作歌七首 并序

里巫行 效昌谷體同酌亭作

丁酉

題羣仙渡海圖 鐘聲

題程序堂畫山水 寄懷張雲汀先生

卷二

戊戌

讀范德機詩口占 古意

送許書谷歸里三首 鈔昌黎集成書後

題周秬白描十八羅漢渡海圖

訪李問原不遇 送王春明廣文

贈許石園兼以誌別 種竹和酌亭

遊圓林寺 冬日過孔望山

遊仙詩四首

己亥

別家

別先君子柩

留別胸陽諸友四首

途中感興

安東道中

渡黃河

席家橋

袴下橋

漂母祠

高郵道中

真州宋舊使館懷古

登高寺塔

題羅兩峰鬼趣圖

得家信

初食鱒魚

登奎光閣

九日資福寺看菊花

論曲絕句三十二首

懷酌亭

程時齋山左書來云有

卷三

登岱之作見示書達而詩不至戲作

庚子

送方竹樓之潤州

看桃花

挽趙雪篷

送鄔超然

寄酌亭

留別許嵩陽表兄

阻風青山

黃天蕩

舟中望攝山

登雨花臺

采石

泊蕪湖

張睢陽廟

桓公嶺

桓公祠

箬嶺

初至家有感

里中雜詩十首 并序

來青軒夜坐

辛丑

深渡

米灘

淳安

謝臯羽墓

過富陽

錢塘江

辛丑正月二十四日過杭州易舟將發倉卒中

偕猶子

嘉錫

放棹西湖僅半日許歸途依依

猶覺清暉之戀人也

過平望

吳江道中

虎邱雲巖寺

滄浪亭

無錫道中

魯子敬墓下作

渡江望金山

卷四

壬寅

錢唐廉吏行爲山陰童丈二樹作 并序

中秋泊美人灣

自高郵至寶應

淮以南數百里無片石累日舟中意殊不樂戲

作夢遊蜀道歌以自廣

讀元遺山集

渡黃河作

宿王家營

發衆興棄驢坐牛車上

順河集

五花橋圯於水行者咸

以舟渡舟人言水自駱馬湖來由沐陽下海

州也聞之悵然

晚抵紅花埠

傾蓋亭

夜至李家莊

渡沂河

過大峪厓

青駝鎮道中同張秋堂飲村店

蒙陰縣

高堂生墓

新泰重陽

羊流店弔羊太傅

望泰山

岱廟

望徂徠山

黨竹溪故里

發肥城口占二首

宿長清白雲閣

嚴相公廢祠

齊河懷古

德州道中

平原行

董仲舒祠

河間獻王墓

鈞弋夫人歌

路見菊花

河間城北三十五里有地曰毛精壘相傳爲漢

毛公薨處胡稚威撰河間縣志謂金末賊毛

積元末賊毛貴皆嘗掠河間壘以毛名非積

卽貴非毛公冢也

癸卯

題吳上舍讀易圖

古意二首上翁覃溪師

客有以萬壽寺僧七松圖索題者書此應之

宋漫堂中丞重雕宋本施注蘇詩乃邵青門所

改竄者原本殘蝕斷爛僅十之七中丞裝標

藏葢自他山所見影寫本後世久不知有真

鼎乾隆癸巳翁覃溪師以十六金得之燕市

舊題曰注東坡先生詩歛書吳興施氏吳郡

顧氏有毛子晉及宋中丞印始知世所行者

非真也癸卯二月出以見示命廷堪作詩題
於後

癸卯二月洪素人比部出守順德覃溪師以所
藏成化七年順德守黎永明所范銅爵贈行
兼送以詩屬廷堪和作

程彝齋招同王石臞工部小集

聞洪素人太守計二首

卷五

甲辰

甲辰二月至揚州金棕亭先生招飲兼贈二律

卽席次韻

誰莊圖為葉詠亭文作

夏日感興

甲辰去揚州阮伯元賦

詩見送作此答之

乙巳

乙巳二月初七日

皇上親臨辟雍講學禮成恭紀二十韻

學古詩二十首 并序

孔撫約檢討過訪深談

竟日

牛師竹先生以余與令

子次原胡大樹思讀書辛苦招游萬泉寺晚

歸設饌暢飲卽席成詩

丙午

送李載園明府之官保定同牛四次原作

懷阮大伯元

曉起望西山有感作

哭章酌亭四十六韻

丁未

小孤山

南昌使署聞翁二宜泉

館選之信用林丈韻呈覃溪師

大梁上畢大中丞四十韻

卷六

戊申

杏花四首和方五子雲

秋帆中丞每歲十二月十九日置酒高會爲東坡作生日丁未冬以病不果於戊申正月補爲之同人各賦七言長句一章時在坐者吳竹嶼舍人張吾山廣文唐柘田進士方子雲布衣洪稚存博士徐朗齋孝廉朱秋巖明經沈春林上舍王石華滿夫二茂才也

次洪稚存開封寒食日追憶舊遊二十首元韻
固城店在柏鄉縣北爲古鄗城其南五里有光武廟後漢書光武帝於鄗南卽皇帝位卽此

地後更名高邑非今之高邑縣也

正定道中示沈八春林

戊申出都留別胡大樹思牛四次原

己酉

牛揮雲太守宣石假山

孫淵如以編修散館改官刑部卻寄

聞阮伯元館選之信 題汪處士印譜

上學使秦端厓先生

庚戌

次韻覃溪師獻縣道中見懷之作

會試聞捷作

四月十八日

正大光明殿覆試恭紀

懷舊詩四首

故禮部尚書座主德定圃先生

故翰林院編修程戢園先生

故陝西道監察御史任幼植先生

故順德府知府洪素人先生

神仙

歸舟雜詩十六首

卷七

辛亥

過龍且鎮作 并序

沐何

過宿遷

楊莊集曉發

符離

蒙城懷古

發渦水

塗山懷古

泊臨淮關

阻風五河縣

泗州僧伽塔近圯於水作詩紀之

蔣家壩

望洪澤湖

周家橋田家

答張集堂明經卽書其

明湖春泛圖後

壬子

題謝蘊山觀察種梅圖

蘊山觀察以官齋種梅詩索和次韻四首

題謝砥山明經藝蘭圖

絕句四首
寄壽翁覃溪師六十生

日四首
蘊山觀察以公子益之

崇之昆季常棣圖見示漫書四首

王沛堂為子作小照賦此報謝

留別蘊山觀察即次見送元韻二首

胡豫堂先生子己酉鄉試座師也壬子八月始

謁見於江寧試院恭呈一律

雞鳴寺

龍江關阻風

蕪湖懷古

板子磯

銅陵

池州道中

安徽節署偕黃左田黃澹人張子白諸同年侍

座主朱石君師飲於萊根香軒聯句

皖城夜感

石君師以重陽次日候

題名錄詩見示次韻

余忠宣公祠

吳越王金塗佛塔歌石

君師命作

高淳憶詩人邢孟貞

過溧陽張燮軒明府招飲座中閱順天鄉試錄

知鮑雙五何春林王曉馨管南英畢蘊山英
煦齋諸人獲雋喜賦

泊宜興

呂城懷古

次韻答張集堂孝廉見寄二首

卷八

癸丑

曉發小店集

沂州道中遇雨

宿塚莊驛

過公家城子

去年秋牛四次原以詩見寄忽忽久未答途中
無事補成一律至都當示之也

答次原詩既成因念及胡樹思孝廉阮伯元宮
詹復用人字韻再成二律

泰安道中

道傍樹

張夏道中

齊河卽事

大風發晏城

宿留智廟

阜城

過臧家橋

宿河間二十里舖

過趙北口

雄縣次壁間韻二首

白溝河書所見

過涿州

過蘆溝橋入廣寧門作

清河橋道中

密雲懷古

石匣城

古北口

青石梁

黃土梁

過灤平縣

過廣仁嶺避雨三義菴

灤陽卽景二首

熱河八觀詩

並序

秀峰書院

武烈水

磬鍾峰

布達拉廟

扎什倫布廟

夜光木

金蓮花

杏春園酒樓

塞上七夕

卽事

詠史二首

塞上新秋

淮陰史上含性嗜花江鄭堂賦芍藥吟贈之癸

丑夏客灤陽出以見示並索和章因次鄭堂

韻

熱河中秋

荏平

孟廟

望嶧山

卷九

甲寅

寄祝座主韓城公七十壽詩四首

題程尹谿觀日圖 題載空上人補衲圖

答孫熙堂 泊橫林

重陽日過嘉興作 雨中過石門縣

塘樓道中 靈隱

龍井 自靈隱至龍井放舟循

白沙堤而歸 次廉使謝蘊山先生九

月晦日行香天竺遂至龍井由瑪瑙寺放舟

而回四首元韻

題胡雒君環山舊隱圖

次韻答謝公子崇之 次謝蘊山先生湖上看

紅葉二首 題簷笠東明經小照二

首

乙卯

喜海寧陳仲魚雪中過訪并題其說文解字正

義 同胡雒君游天竺

韜光 過嚴子陵釣臺

白沙埠 港口道中

街口舟中即事 金灘

題程易田先生讓堂話別圖

休寧道中 望齊雲巖真武殿作歌

雨中過楓嶺

大洪嶺

油柞嶺道中

柏山渡雨發

發雞兒灘雨中即事

黃湓

渡江喜晴

題桐陰讀易圖

采石望虞雍公戰處有感

金陵懷古用王荆公韻四首

卷十

丙辰

題王柘庭壯士十年歸圖

周最峰邀游敬亭山翠雲庵歸以詩見示奉和

二首

題朱琴川集陶詩後四

首

次韻答朱立堂

寄祝山西方伯謝蘊山先生六十壽二十四韻

丁巳

寧國學署梅花盛開偶作

聞抱經先生卒於常州之信

皖城喜晤朱少河同年即次石君師寄少河詩

元韻

座主石君先生內遷兵部尚書恭送四律

泊大通

偶成

題表忠錄為桐城孫節愍公作

晉輒歌 并序 題胡本亭小照二首

題吳楚帆同年洗硯圖二首

題孫雨窗公子竹窗聽雨圖二首

伯元閣學以秋桑詩四首見寄時別逾四載離

緒方深謹次元韻聊志搔首踟躕之感

題張季虎天女散花圖

王子卿取易觀卦六三爻辭作觀齋圖因以自

號石君師闡風地之義題之蓋勉以觀國尚

賓云爾丁巳十月子卿來宣州出以見示爰

用鄭學發明師說

吳春麓同年客宣州每過學齋輒論文不倦昨

以二詩見柬意甚謙下余愧其言久而未答

時春麓家貧將以縣令就吏部選而會試之

志不堅酒後偶有所觸率成二截和之與來

意各不相蒙也

卷十一

戊午

題楊克堂醉漁圖 偶作

答孫雨窗公子見寄二首

題張季和黃山紀游詩卷

石君師用昌黎薦士詩韻題校禮圖見贈五言

古一章敬次元韻報謝兼答阮伯元閣學王

儕嶠編修

晨起見庭中鳳仙花大放偶作

錢氏蒲圻張兆書妻也兆書卒兩子皆殤兆書

有兄前卒其遺孤隨嫂他適錢取歸而子之

又取其母家溺女育之以爲婦張氏祀得以

不絕朱石君師爲作孝友慈貞詩敬次元韻

巳未

巳未四月二十八日閱會試題名錄知牛次原

諸人登第喜而酌酒醉後有作

題朱約齋小照

讀史有感二首

禮經釋例稿成有作

庚申

題黃少眉笈雲圖小照

周最峰以愛游圖見寄索題

施明經南歸聞胡樹思卒官京師之信

雨夜讀張江陵太岳集書後

過湯霍林司成故宅

後學古詩十首

有序

野望

卷十二

辛酉

黃直民同年以其先人牧原先生蘭心圖索題

漫書一截

舟中卽事

答姚姬傳先生

皖上留別曾西井明府

泊繁昌舊縣舟甫繫風浪大作戲成小詩

題邢佺山同年讀書松竹林圖

辛酉春聞謝崇之公子去秋鄉試捷音兼寄中

丞蘇潭先生

程敬持舊及余門今春

不遠千餘里自胸山來從學余甚愧焉頃將
應江寧鄉試於其行也詩以送之兼寄令叔

石村

遺悶

小游仙詩二十首

有序

晚桂

我愛二首

長興三鷗岡有晉謝太傅墓歲久漸湮邢佺山
同年捐俸葺之并爲考見示徵詩漫賦一律

壬戌

和杜竹吟刺史元旦卽事

答趙肖巖中書見贈二首

朱錫章大令以飲中八仙圖屬同人題分得李

適之崔宗之二首 洪稚存同年自塞外歸

土講旌德迂道過宣城見訪留宿齋中次日

邀同趙肖巖中書戴斗垣廣文滄斗垣令子

爾勤孝廉徧游南樓諸勝晚歸小酌卽席成

詩 戴爾勤孝廉見和鄙作

謙下過甚請受業於余同辭不得命仍次前

韻奉答兼以志幸 題吳復齋夢遊僧寺悟

前生圖 李營甫司馬招飲卽席

卷十三

癸亥

宛陵晤蔣希裴并追憶令兄竹史同年

題瞿萇生枕庭讀禮圖二首

宿西河鎮蚊多不能成寐戲作

詠道旁烏柏樹 寄張季和

錢辛楣先生以壬戌四月二十六日重游泮宮

詩寄示命和次韻 方穀存書來以二詩見

懷索鈔鄙著甚殷且云有重鈔通雅之舉奉

答二首穀存密之先生五世孫

讀崔寔政論作 張季和以尊甫柏園先

生西阪草堂圖屬題漫賦一律

朱學坡庶常之母未婚守志介陳鳳石同年來

徵詩應以二截句 題張鞠園太守揚子飽

帆圖

題許節婦帶餘草

名燕 珍

二首

題楊健齋明經詩卷二

首

答方象三

題蒲快亭同年出塞圖

蒲快亭施雪帆以小集北樓詩見示戲柬

癸亥十二月梅花大開偶作

甲子

吳之水騎尉新構書室成屬作詩落成率賦二

截

次韻牛次原戶部庚申

初秋湘江舟中見憶二首

寄祝座主韓城公八十生日四首

次吳石臣進士見贈二首元韻

方茶山同年以比部郎出守江西迂道宣州過

訪是晚飲魯子山太守署中次日招同吳石

臣進士戴斗垣廣文小集學齋卽席成詩兼

以誌別

甲子重陽前後屢有持

蠖之會座中施雪帆戴蓮塘吳石臣戴斗垣

諸君疊韻倡酬索和甚亟勉成長句

次韻魯子山太守西華紀事詩四首

題同年陳子犀比部借書圖二首

周石落明府以其六世祖忠毅公玉印見示并

索題句敬賦一章印刻季侯二字公名宗健

季侯其字也

題汪鑑亭太守小照二首

題戴斗垣漑菊圖二首

卷十四

戊辰

戊辰三月晦日雪 卽事

月夜卽事 麗仲出十年前所畫小

照見示漫書 題畫冊因憶舊遊二首

聞戴爾勤南宮捷音詩以寄之

深渡去歛南六十里乾隆庚子偕先兄及大姪

扶先君子柩歸葬次年正月由浙往揚泊舟

於此風景尚依依如昨也

威坪卽挈源洞在淳安北六十五里韓蘄王擒

方臘處也 桐廬

將到杭州作 舟中坐雨

秋分日渡浙江作

舟中即事二首

姚江篇

鄞城秋感

夜渡曹娥江

游南鎮廟道逢芸臺中

丞騶從口占

南鎮廟

過蕭山

歸舟偶作

戊辰十二月十九日雪後登小金山其地去淳安十里有汪氏始祖墓墓前石刻書乾隆己巳稠墅汪氏重修其記稱漢中平間龍驤將軍守會稽汪文和深以為訝同游者云是漢時欽州刺史見汪氏家譜當必有據戲拈一

截示之

己巳

紙鳶戲和陳桂堂太守

題阮梅叔珠湖漁隱圖

題韓錦仙課經圖

寄張髮伯

贈種花汪叟

有序

先師次仲先生年十五能詩其集編年則始於甲午隨時地各異其名甲午至丙申為學吟集丁酉至戊戌為備書集總名紫石山房吟草後刪為海隅集己亥為鑿江集庚子十一月至辛丑二月為

負土集壬寅八月至十月爲遊燕集癸卯至庚戌
本名春草閣詩後更刪爲易蠲集及秉鐸我郡乃
去舊集之名統前後所作總名校禮堂初稿於舊
作間有刪改庚午冬錦往海州搜輯遺稿多被人
攜借鈔閱程君敬持同門中最留心詩學者得詩
底木十之四擬欲付梓錦謂零星傳之不如總編
之爲尤可行遠也竝索歸共編輯爲十四卷顏之
曰校禮堂詩集至乙丑丙寅丁卯三年無詩者讀
禮不吟非佚也昔先庄嘗以作詩之法示學者曰
詩本言志須充之以學養之以氣取法於歷代詩

家一切超前絕後之作其道乃成若徒以古人之
詩而摹擬之雖李杜蘇黃諸集於我無益也故先
師所自爲詩學富才贍能兼古來作者之美而自
成一家前學使白小山先生序之曰時而渾涵汪
洋千彙萬狀則少陵之爲也時而崇巖峭壁萬仞
崛起則長吉之爲也又時而吐語高華修詞綺富
則錢劉溫李之爲也而其錦竊謂卽此愈可見自
成爲先生之詩矣至於聲韻之協對偶之工江鄭
堂先生尤歎爲一時獨步今詩具在讀者當自悟
焉時道光六年仲秋月朔日受業宣城張其錦謹

識

校禮堂詩清息向黃時有雅音雖或率尔採觚
語含酸隘而微文取典多合體裁其因題發議扶翼
誼訓尤非淺士陋儒以能放恣一時受位名家中推為
清才獨出者矣因注甲子三月會稽李益銘書

校禮堂詩集目錄

小門人宣城張家湜校字

校禮堂詩集卷一

歛凌廷堪次仲撰

甲午

靜女吟

靜女顏如花靜女心如石一任春風吹肯使眉峰碧井
水不生波槁木不生枝春風日搖蕩春風空爾為

送人南歸

節近清明喚賣餚伯勞飛燕帶離聲乍聽夜雨難為別
纔換春衣又送行遮路雜花歸騎緩蔽江新柳客帆輕
到家正及櫻桃熟願借東風十日晴

此卷少作詩無可取

同章酌亭夜游國清寺

偶來遠公社共逐白雲行天籟發何處松聲相與清林
風驚鶴夢潭水澹人情永夕結遙想霜華流月明

河溢

甲午八月十九日鐵牛岸崩河水溢黃流浩汗訇如雷
淮壩盡作蛟龍室黑風吹水相鬪爭濤聲撼天天爲驚
可憐黔首走無路咄嗟人命鴻毛輕傳說瀕淮百餘里
居民皆逐洪波徙號呼望救聲入雲富強登舟貧弱死
死者骨肉爲塵泥生者俱上長淮堤淮堤無米不得食
惟見日暮風淒淒垂頭枵腹但枯坐編葦棲身忍寒餓

濕薪爇釜冷不煙婦子無聲淚交墮作詩寄語淮之民
九重恫瘝同一身指日

恩綸下天府河隄使者加拊循補偏救弊

頌 聖王政坐令葑屋生陽春洪範五行多附會願隨擊壤

皇仁

乙未

和酌亭彈琴見憶之作

林端棲鳥寂危坐撫冰絃衆壑自成響孤雲方倚天相
思托明月雅韻寄流泉同調關心久臨風倍惘然

彈琴期凌仲子不至

續溪章河酌亭

向夕雨初歇。美人期不來。當門松竹靜。臨水菱荷開。高枕涼生簟。疎簾月照杯。孤琴候蘿逕。永夜意徘徊。

秋日飲酒用秦太虛韻四首

山居寂無事。養此衡茅真。秋風颯然至。黃葉落我身。感此悟物理。一故難更新。不如飲美酒。緬彼羲皇人。舉杯追羲皇。何論秦與漢。螺贏螟蛉流。不復同憂患。二氏小智鑿。六藝大道散。獨醒泊沈酣。達觀本無間。頽然卧前楹。呼童為煮茗。茗熟松風瀉。我醉方未醒。夢化蝴蝶形。神遊太古境。恍惚逢麴君。相與話醅酌。

覺來秋聲作。起拭蛟龍脣。幽咽不成曲。還酌梨花春。醉鄉有天地。寥廓誰與鄰。萬事皆不知。聊用怡吾神。

酌亭往贛榆云十日始歸作此懷之

分手能幾日。離懷難自由。相思頻望遠。風雨亦登樓。山送溪聲晚。天連海色秋。遙憐素心友。吟斷白蘋洲。

登謝祿山觀海并序

宋樂史太平寰宇記東海縣有謝祿山在縣西一里。王莽時東海徐宣謝祿擊莽將田况大破之。曾屯兵於此。因名。按今鳳凰城即宋東海縣故城。山在城西一里。與記合。其為謝祿山無疑。土人呼為社林山。蓋

聲之轉也舊志不知鳳皇城爲東海故縣第稱賈似
道所築蓋似道寶祐二年嘗城東海也乾隆乙未同
章酌亭來游賦此紀之俟他日撰地志者采擇焉

陽侯驅濤天外來巨浪倒蹴青天開瀆淪一氣望不辨
喧闐白晝生風雷長空灑滌日月伏遠浦擊汰鼉鼉迴
被襟有客踞峰頂下瞰萬頃如一杯金蟬小島浪花裏
狂瀾作柱猶崔嵬天風浩浩肆鼓盪兩腋蓬勃何雄哉
乘風我欲到元圃願挾盧敖游九垓青螭桀驚不可馭
側身東望空徘徊妖蜃播靈競幻化滄溟忽闕金銀臺
飛仙羽士控鸞鶴珠宮貝闕疑瓊瑰眼前此景許誰道

元虛一賦真奇才昔者巨君竊漢鼎赤眉曾此屯渠魁
西行入關走更始提挈盆子如嬰孩白水真人坐高邑
迅掃六合無氛災鐵脛銅馬已泯滅尤來大槍俱破摧
茲山尙得名謝祿不與囂述同蒿萊田橫島連呂毋固
至今魚鼈猶生哀海濱自古稱盜藪鯨窟安得揚塵埃
分爭割據底足問鯤鵬蜉蝣皆劫灰俯仰宇宙三歎息
浩歌擊劍傾尊壘

丙申

牛墩河

斷岸一雙墩孤村三兩家人煙聚高阜帆影落殘霞行

役心初壯登臨興未賒黃雲連曠野四望總無涯

古佛寺大松歌

在大伊山上即太平寰宇記所謂大伊萊山也寺有二松皆數百年

物一統志古佛寺在大伊山後宋時建

金繩掣斷開天宮天門夜遁雙虬龍霹靂一聲墮山谷
化作天矯百丈之長松幾經劫火燒不死爪甲怒欲行
虛空古肪下凝赤琥珀孫枝上結青玲瓏根傍胡僧憩
寂莫松子食盡方兩瞳倥傯已往不可作唯聽濤聲日
夜相撞春千年老鶴化道士聽經夜步中庭中月明天
籟下空碧清唳相答流松風似此萬牛迴首棟梁質胡
為俯首遜蹟榛莽叢大材固難售良匠安可逢降身乃

與樗櫟等雨露亦戴造化功清泉白石恣偃仰澗底鬱
鬱長青葱蒼穹有路或可上天生神物寧長窮他日晦
冥風雨恐飛去寄語山僧持護須從容

雨中遲章酌亭不至戲作長句柬之

北風朝來緊格格癡雲壓檐雨連夕小窗寂寞卷慵開
竹樹蕭森起寒碧淙淙潤物漸有聲指顧春膏深一尺
東阡西陌半冥濛始信陽和能布澤田夫歡喜餉婦歌
今歲坻京看宿麥其如賤子卧茅齋咫尺同心竟睽隔
相思相憶不相見卻對甘霖亂愁積安得祗祗沃四野
獨我門前晴似炙離憂農事兩無妨底用披簑著雙屐

偶生此想旋大笑跨鶴揚州真戲劇雨師非汝舊相知
豈能屈曲從汝役祁寒暑雨民怨咨造物元無百全策
假使車前開八駟蜀錦連錢何足惜不然被甲戰潢川
冒雨猶看奮矛戟可憐潢潦悉江河此境唯能困貧客
聊作長歌持寄君胸次休教苦偏窄於此絀則於彼伸
消息盈虛在義畫會須張繖挈榼來聽雨聯牀浮大白

和作

章 洞

好句風吹至相思咫尺違但令天作幕何必瓦爲衣
古砌添蒼潤閒窗失翠微酒徒如可約著屐叩君扉
。游崇真觀同酌亭作

脩竹過牆柳四圍小橋南望路依稀水涵秋影雁初下
門掩夕陽僧未歸禪室半收青嶂入畫檐低露白雲飛
談餘試向空庭立不待聞鐘已息機

送吳牖雲

斫地高歌一曲終何須搔首歎萍蹤馬當中坂虛爲驥
劍過延津定化龍渠輩但知温飽樂吾曹那作別離容
搶榆斥鷃多相笑珍重扶搖九萬重

送程時齋游關中

丈夫旣不能建不世功麒麟貍象光熊熊復不能遠遊
束書事萬里名山大水羅心胸吟詩作賦北窗下砢砢

烏足稱英雄程君吾郡名家子壯懷欲交天下士朝來
擬作秦中游仗劍咸陽訪知己臨岐握手東海頭一杯
酒盡青山秋送別以詩世俗見可憐多事韓與侯祇將
一言向君說醉後分明寸心熱但須氣壓蒼山低莫使
歌殘唾壺缺君不見衛叔卿逍遙白鹿游太清又不見
李謫仙欲攜好句驚青天仙人詩客身已沒姓字嶽嶽
直與太華名俱傳程君程君勉乎哉眼前齷齪多凡材
富貴直可操券得向西一笑長安來黃河如絲走奔雷
日射四扇潼關開二嶠九嶷青崔嵬此時目已無雲臺
顧盼叱咤皆可喜收拾山川來筆底萬顆驪光千尺長

好為故人傳一紙故人豪氣空峻嶒干霄伏櫪均無憑
春來盼斷梅花使夜夜相思隔灞陵

二十生日作歌七首 并序

杜少陵同谷七歌其體出於平子四愁其數同於枚
乘七發沉鬱頓挫神與古會所謂不可無一不可有
二者也青龍在涪灘之歲廷堪生二十年矣日躔壽
星月離觜鱗吾降值焉聊師少陵遺意作短歌七章
以寄慨學步壽陵非愚即妄知見唾於識者然鵬鷄
不過大小之分而已其所以自適則均也

男兒致身貴年少里閭顧盼生光耀二十風塵名未成

爲爾寂寂鄧禹笑塞外敢云可立功肘後取印更難料
有時美酒傾千觴百端交集何茫茫

我昔孩提先子逝終天之恨誰與陳有匱十年未歸葬
嗚呼天地一罪人稜稜寒月浸旅櫬白楊聲急狐狸嗔
回首故鄉不可見再拜荒原淚如霰

小人有母喜強健與兄力養共操作清晨奉觴爲母壽
侑以雞豚雜藜藿忽聞剝啄知友來更出草蔬供友酌
我友不以我爲薄雖在貧賤亦云樂

原上春令飛急難嗟我伯仲常饑寒他鄉辛苦久行役
南望淮水波漫漫霜露將降木葉脫八月念子衣裳單

秋燈夜雨照斗室胡不歸來聽蕭瑟

海東有山名蓬萊中有玉闕金銀臺神仙排雲導客上
青童笑進黃金杯王母髮白廣成老我壽天地同昭回
惜哉欲往鯨鯢隔不能生彼昇天翼

有蠹有蠹乾書帷窮經矻矻令人悲英雄本色在戈戟
瑣瑣安事毛錐爲弓作霹靂箭餓鴟景宗壯士真可見
何當盤稍策怒馬生擊猛虎南山下

我懷無限向誰剖游仙擊劍竟何有人間富貴如浮雲
那知許事且飲酒糟牀已注禾黍豐天公畀我意良厚
丈夫遇合終有時何必長歌獨搔首

○里巫行

巫鼓一擊靈旗開踏雲天馬從天來神弭再調萬靈塞
金支翠羽紛如織爭言神來人莫覩老巫偃僂代神語
刈穀多晴種多雨神鑒汝誠當佑汝數言未畢男婦欣
呼兒酌酒酬謝神神歸無聲山悄悄家家殺雞供巫飽
巫飽日暮攜錢歸前村後村蝗亂飛

○效昌谷體同酌亭作

碧光皎皎嘯林末陰氣觸膚寒似割白楊得風作人語
無數青燐草間活千年笑曆化成土剩夢零魂無定所
古苔生骨寒不眠秋井燈昏夜來雨

丁酉

題羣仙渡海圖

昔夢乘赤鯉高舉攀紫烟蓬萊方丈若在望羣仙招手
虛無邊三千弱水不可以徑度乃呼徐福喚取秦皇舊
日之樓船樓船已朽不知處風馬雲車若可馭駕青虬
兮驂白螭金支翠羽光離離雙童執節前導引海水羣
立搖空飛回頭偶一顧塵世但見齊烟九點青微微此
時萬靈百怪爭來集海若出舞巨鼇立然後左攜洪厓
生右挈浮邱公安期羨門時一逢身披百尺繡繡黻手
把十丈金芙蓉珠宮貝闕忽已到握手千年唯一笑蕭

我揖讓升階行琅玕芝草穿徑生兩傍仙娥各美好肌
如玉雪長眉青瓊筵乍開仙樂奏魚鳳烹龍競相侑虎
瑟鸞笙歌未停喔喔天雞驚曉漏覺來枕席皆烟霞半
壁寒燈小於豆此情此境難再求披圖恹恍思夢遊瀟
聲山色盪尺幅仿佛幻景凌滄洲羣仙相看舊識面我
欲從之游碧漢故人云此是丹青令我茫茫目幾聒吁
嗟乎神仙有無何渺茫夢游圖畫俱荒唐何如日夕飲
美酒醉卽射虎南山岡

鐘聲

斷續寒空外疎鐘到處傳一聲驚敗葉半夜警枯禪野

寺月窺牖客舟霜滿天何人發深省三復杜陵篇

題程序堂畫山水

碧天無際水滔滔千尺憑空斷岸高老鶴不鳴江似練
萬松深處捲秋濤

寄懷張雲汀先生

我所思兮不在於南不在於北復不在於東側身西望
心忡忡我聞神州之西有蠶叢肇基上世開鴻濛愚公
所移巨靈所擘皆不及此唯見縣厓疊嶂突兀撐青空
我所思兮在其中其中風土多不宜身雖未到聞而知
西南漏天古未補至今幽澁常多雨駕鵝前飛狨後舞

被髮猩猩作人語烟昏密箐啼斷猿月黑深林嘯飢虎
青泥高兮我馬愁水有石兮能摧舟宦遊商賈均有求
君獨何爲此淹留或言草堂之詩文園之賦或以土居
或以流寓江山有助文章奇萬歲千秋名益著君不歸
故鄉良亦職此故憶君在海上授我爲聲詩謂我下筆
古有若屈宋辭別來歲月如飈馳羣言百出塗多岐吁
嗟乎我無長房術縮地焉可施我無晨風翼安能凌風
飛支離散木失規矩重蓬匠石知何時

讀范德機詩口占

雨止修竹流螢至此句見賞王漁洋果然幽澁如鬼語

尚遜池荷聞暗香

古意

夏雲非春雲反覆無定姿郎心非妾心知郎心向誰

校禮堂詩集卷一

校禮堂詩集

卷一

十一

校禮堂詩集卷二

欽凌廷堪撰

戊戌

送許書谷歸里三首

秋風從西來吹我游子裳感此命僕夫晨起趨行裝借
問此何之駕言歸故鄉黯然念居人置酒臨高堂明知
別在邇且與暫傍惶相顧不能語離心浩茫茫賤子歌
一言爲君佐壺觴生才冀有用種蘭冀有芳努力崇令
名胡爲結中腸

飛鴻猶惡離征馬常念羣况我本未歸復與親串分相

送上河千木葉何紛紛伊人隔秋水極浦多寒雲欲賦
送君詩恐君不堪聞綢繆各自知焉用飾虛文揮手開
征帆去去勿復云

廿載處海濱寂莫誰為儔羈旅未能返心事悵悠悠甘
旨給藜藿邱隴荒松楸翹首望舊鄉欲歸道無由今忽
送君行淚下不可收悽惻良有以豈徒因離憂何時乘
長風翩然送歸舟其子把釣竿濯足雙溪流

鈔昌黎集成書後

苦被饑驅不自持雞鳴為利日孳孳年來猶喜傭書暇
鈔得昌黎一卷詩

題周秬白描十八羅漢渡海圖

吳門畫師周秬貌人貌鬼皆好手偶然寫作十八羅
漢渡海圖神采都非塵世有其一偏袒露雙腳虬須連
蜷肩戍削其一張目苦無語以手指口神澹漠高顙老
宿瘦兩頤肢體乾腊疑枯龜控伏獅子如控狸巨力信
足驅熊羆何人纓絡下垂地或來把臂笑相示別有應
真駕杯水上游安穩不啻萬斛舟漫驚徑寸之器不能
容此大法相彼己身境兩忘有如靈地牛背立比邱攜
隻鳥豐者趺坐頤者壓其脊電眸虎齒龐眉師側視廣
穎手拄錫其餘炯炯亦天人四注元精不可敵最後者

一尤彭亨狀貌大略同山精不撓外物中有恃目送黃
龍蜿蜒形或聚或散波面行天吳馮夷俱震驚海若秉
圭磬折迎尺幅萬里聞雷霆人間絕技竟有此是畫是
境恍惚難分明我聞伯時畫馬身卽馬心手相融烏可
假知君應是病瞿曇聊向毫端示般若

訪李問原不遇

索處少歡趣偶然乘興來且看修竹坐不必主人回籬
短犬迎客庭寒雞啄苔他時重到此新釀爲予開

送王春明廣文

四山黃葉句傾倒已三年豈意論交日翻成送客天未

懸名士榻誰送廣文錢衮衮何須羨新詩世久傳

贈許石園兼以誌別

石園爲予中表親睢陽太守之子孫十年占畢不得志
束書遠入春明門一官潦倒走代朔袴褶黃驄老沙漠
雖然束帶持手版豪氣猶能振山嶽窮邊九月黃雲開
雪花手大從天來受降城下縱小獵千騎蹴踏轟如雷
寒空萬里沙草自神珠應手飛霹靂蒼鷹悍然抉雲去
狡兔妖狐皆失色元熊飲羽挾樹死灑面腥風雪俱赤
擊鮮下馬紛喧譁葡萄互送何豪奢代姬酡顏艷朝霞
尊前爲我彈琵琶酒酣興劇鄉思賒穹廬風捲殘雪起

疑是江南桃李花歸來一一向予說夜永談深詫奇絕
是時嚴冬初落雪斗覺燈前壯心熱不辭大白當君浮
志氣矜碑橫嵩邱屠門大嚼聊快意腰下含笑看吳鉤
朝來甦醒分手去黃鵠雙龍不相顧他時游興倘未倦
短衣期子邊城路

種竹和酌亭

卜築青山下寒泉繞屋流分將數竿碧添起一庭秋雲
鎖疎窗靜烟含小徑幽養成瓊玉質應有鳳來游

元作

章 洞

已具干霄勢何妨傍石栽夜涼深院落寒碧小池臺

淡影低臨水清陰靜覆苔他時風雪裏留待伴疎梅

遊圓林寺

出郭山光潑眼新客來古寺正清晨穿林殘磬不驚鳥
當戶老松如攪人風定香煙微有蹟潭空雲影淨無塵
浮華到此都銷盡細撚曇花認宿因

冬日過孔望山

窮臘溫風拂面吹道傍景物儼春時橫塘水淺竹籬短
只欠桃花三兩枝

遊仙詩四首

七寶爲犁玉琢耒瓊田日日種明珠耕霞麟子肥於犢

不羨真靈位業圖
雲查扶上最高層銀漢迢迢冷不冰
摘取春星三五顆
夜窗聊當讀書燈

閒攜仙侶御風行
為訪桃花叩玉京
偶拂蔚藍書幾字
下方都道慶雲生

通明禮罷玉皇回
鸞背天風兩袖開
猶覺六銖衣太重
阿環親剪絳雲來

己亥

別家

東風榮蓬根蓬生日以滋
欲逐道塗轉戀此三春暉
遊

子昧爽興再拜辭庭闈
廿載依膝下未嘗頃刻離
今日遠行役恐母常念兒
行李行載塗猶復牽母衣
兄為引離尊欲語仍含悲
僕夫催登程相視徒依依
我馬何蹀躞我車何逶迤
飄飄白雲飛悠悠使我思

別先君子柩

旅櫬淹胸海悠悠十八春
卻含將別淚猶是未歸人
漫誦千言賦空驚七尺身
江鄉何日返南望倍酸辛

留別胸陽諸友四首

幾年杯酒其論文紅燭烏絲靜夜分
此去揚州明月下玉簫聲裏定思君
程時齋

木石堂詩集卷二
童禪交親二十年別離那得不淒然何時重到臨溪屋
剪燭關門聽雨眠李問原

連宵風雨食猶寒把臂休論行路難客邸吟餘倘回首
相思應展畫圖看程序堂

春草春波綠正遙別魂真見黯然銷問君此後懷人夢
知到揚州第幾橋章酌亭

途中感興

驢背吟鞭不暫停風光蕭瑟徧郊坰夕陽返哺漸烏鳥
春樹分飛感春令夾道送迎雙隻堠閱人來往短長亭
舉頭北望雲連野目斷遙山一帶青

安東道中

風沙驚浩浩一望大堤平塔影標晴日河聲撼古城壤
畦青草滿老屋白茅輕去去發長嘯壯懷空復情

渡黃河

沙土冥濛撲面多蕭蕭行李渡黃河孤帆背日離高岸
一葉凌風蹴怒波淺瀨客方看雁鷺上游人說走蛟鼉
時儀封 羈懷牢落何須問擊楫中流發浩歌
河決

席家橋

一溪春水晚蕭蕭破帽疲驢路正遙杜宇數聲殘照裏
柳花飛滿席家橋

稼下橋

蹶楚封齊事偶然英雄誰肯乞人憐
我來帶劍淮陰市不見當初惡少年

八漂母祠

項籍婦人仁不辦殺沛公漂母仁
婦人乃哀王孫窮一飯淮陰成不朽
一炬咸陽復何有賢愚千載兩不知
獨對長淮自搔首

。高郵道中

齒齒晴波漾淺沙石橋南去有人家
柴門半掩竹籬短黃蝶一雙飛菜花

。真州宋舊使館懷古

咸淳師相書畫客悅生堂中養促織
天子殷勤枉下拜羽書不省樊城逼
元祖手握扶桑弓殪金與夏如獵鴻
西平諸蕃繞滇蜀此時目已無江東通
和使者真難遇無罪拘之亦何故
矯矯龍性不可撓况復批鱗觸其怒
遂令吳越百萬家兒女血肉飛烟沙
白雁一聲渡江去六陵開徧冬青花
匡山夜夜啼杜宇眼見江山生換主
杭州歌惡不耐聽厠上拉胸何太苦
木棉菴畔秋月黃夜深燐火青茫茫
當時本爲保富貴不知國滅身亦亡
我來覽古真州道滿目平蕪盡春草
一片濤聲卷向東

木雁堂詩集 卷二
漠漠江天去雙鳥指點遺墟問郝經至今猶恨小朝廷
著書館廢知何處惟有年年薺麥青

登高 寺塔

千尋拔地勢蒼茫獨客凌虛覽八荒塞馬北來悲太武
大江東去憶孫郎有時白浪吞瓜步無數青山拱建康
試發狂歌答鈴語鳥飛不盡暮天長

題羅兩峰鬼趣圖

苔乾庭黑初落月老鴉如人語幽咽歎來山鬼瞰燈滅
此時讀君鬼趣圖一豪幻出鬼一車陰風咫尺生座隅
經營慘澹天外想畫成魑魅與罔兩播弄無窮之伎倆

想見當初落筆時窗外百靈不敢離夜深風破寒江遲
夷堅之編宣室志圖形難於述其事何人漫云畫鬼易
我聞役鬼須錢多坐令衆鬼來奔波君今囊溢奈鬼何
况君詩聲宏且大險語能令鬼膽破何物鬼子敢相過
囊富名高均足嗤鬼中之趣吾知之與君潑墨爲新詩
。得家信

忽忽辭家客蕭條對酒杯恰當三月暮喜見一書來乍
讀平安語暫令懷抱開羈心極流水無處不滌洄

。初食鱒魚

桃花簌簌雨踈踈寂莫無因慰索居幸有主人能愛客

不辭燒筍煮鱖魚

登奎光閣

雕甍百尺俯清秋長嘯橫空獨倚樓山向眼中排闥入
江從掌上拍天流浪傾白墮非吾土如此黃花竟客遊
砧杵滿城聲正急西風何處攬貂裘

九日資福寺看菊花

颯颯西風吹布袍真州九日又登高偶然泥上留鴻爪
莫惜花前擘蟹螯紅葉晚堆孤寺徑碧天秋捲大江濤
陶然一醉應吾事休向清尊問二豪

論曲絕句三十二首

此六清曲者法不可不知

三分損益孰能明瓦釜黃鐘久亂聽豈特希人知大雅

可憐俗樂已飄零

唐志所稱俗樂二十八調今祇仙呂等六宮大石等十一調而已

工尺須從律呂求纖兒學語亦能謳區區竹肉尋常事

認取崑崙萬里流

誰鑿人間曲海源詩餘一變更銷魂倘從五字求蘇李

憶否完顏董解元

時人解道漢卿詞關馬新聲競一時振鬣長鳴驚萬馬

雄才端合讓東籬

大都詞客本風流百歲光陰老更遒文到元和詩到杜

月明孤雁漢宮秋

為文前後公相襲千古才人慣乞靈若為西廂尋粉本

莫忘醉走柳絲亭

王實甫西廂記全襲董解元即莫戀宸京黃四娘一詩亦董本所有也

清如玉笛遠橫秋一月孤明論務頭不獨律嚴兼韻勝

可人鴛被冷堆愁

殘紅撲簌胭脂落大石新詞最擅場安得櫻桃樊素口

來歌一曲傷梅香

二甫才名世並誇自然蘭谷擅風華紅牙按到梧桐雨

可是王家遜白家

天子朝門撮合新後園高弔榜頭人青衫淚與金錢記

祇許臨川步後塵

元青衫淚朝門勅配金錢記弔考韓絢皆湯臨川之粉本也

妙手新纈五色絲繡來花樣各爭奇誰知白地光明錦

卻讓陳州糶米詞

仲宣忽作中郎婿裴度會為白相翁若使硜硜徵史傳

元人格律逐飛蓬

元人雜劇事實多與史傳乖迥明其為戲也後人不知妄生穿鑿陋矣

比干剖心鮑吉甫元英拜佛吳昌齡摘星樓暨唐三藏

莫笑謔言都不經

博望燒屯葛亮才隔江關智戒筵開至今委巷談三國

都自元人曲子來

是真是戲妄參詳撼樹蚍蜉不自量信否東都包待制

金牌智斬魯齋郎

元人關公往往有極無理可笑者蓋其體例如此近之作者乃以無際可

指為貴於是彌縫
愈工去之愈遠

傳奇作祖施君美散曲嗣音陳大聲待到故明中葉後
吾家詞客有初成

弇州碧管傳鳴鳳少白烏絲述浣紗事必求真文必麗
誤將剪綵當春花

四聲猿後古音乖接踵還魂復紫釵一自青藤開別派
更誰樂府繼誠齋

玉茗堂前暮復朝葫蘆怕仿昔人描癡兒不識邯鄲步
苦學王家雪裏蕉

齟齬顰眉各鬪妍粲花開出小乘禪鼎中自有神丹在

但解吞刀未是仙

仄語織詞院本中惡科鄙譚亦何窮石渠尙是文人筆
不解俳優李笠翁

婁東辛苦變吳歛良輔新聲玉不如誰向岐陽摹石鼓
世人爭效換鵝書

一字沉吟未易安此中層折解人難試將雜劇標新異
莫作詩詞一例看

語言辭氣辨須真比似詩篇別樣新拈出進之金作句
風前抖擻黑精神抖擻著黑精神扎撒開黃髭髻康進之黑旋風負荆端正好曲也

半窗明月五更風天寶香詞句浪工底事五言佳絕處

不教移向晚唐中

王伯成天寶遺事半窗千里月一枕五更風似晚唐人詩於曲終不類也

前腔原不比么篇南北誰教一樣傳若把笙簧較弢索

東嘉詞好竟徒然

諧聲製譜幾人諧徐沈分鑣論北南白介云科渾不辨

浪傳于室其寧菴

卽空三籟訂南聲騷隱吳騷亦有情更與殷勤編曲品

羨他東海鬱藍生

五聲清濁杳難分去上陰陽考辨勤韻是劉臻當日訂

周郎錯怨沈休文

周挺齋中原音韻亦誤以廣韻爲沈韻

一卷中原韻最明入聲元自隸三聲扣槃捫籥知何限

忘卻當年本作平

先繼近禁音原異誤處豪釐千里差漫說無人辨開閉

車遮久已混家麻

下里紛紛競品題楊阿激楚付泥犁元人妙處誰傳得

只有曉人洪稗畦

懷酌亭

回首河梁袂乍分滿天霜雪悵離羣揭來清夜吟餘際
不夢梅花卽夢君

答凌仲子

章洞

琢就新詞字字嬌此行况聽玉人簫憑將滴粉搓酥

句唱徧揚州廿四橋

程時齋山左書來云有登岱之作見示書達而詩
不至戲作

抉奇古仙人不憚梁父艱齊魯未了青約束尺幅間丈
人日觀等野馬囊中照耀金孱顏山靈拘囚苦局促夜
化老人來叩關再拜告古仙何時歸我泰岱山答云我
友在江介聊復寄示行當還退而訢真宰真宰大笑噴
其頑乃命六丁握電逐金刀下剗赤鯉腹帶血持上天
天公讀之亦欣然含笑顧玉女藏之金函貯天府新詩
留絳闕素書不可發詔許赤鯉將之行又賜九河爲滄

血神丹合其創素書與之吞置向天河中乘潮下天門
天門水與長江通波濤汨沒隨飛龍飛龍騰蹕踏雲去
朱鬣花鬢落釣筒有客相思適相遇呼童攜歸得尺素
讀罷遲回思欲迷江天雲暗雨淒淒雄文險語知何處
塵世惟留小赫蹏

校禮堂詩集卷二

校禮堂詩集卷三

歙凌廷堪次仲撰

庚子

送方竹樓之潤州

泥滑冰融水亂流
離人又放渡江舟
此行飽聽西津雨
乘興還登北固樓
疎柳有情迎客眼
落梅無數打船頭
揮豪倘欲尋藍本
一上高山望五州

看桃花

步屨桃花裏
桃花無路通
回看舊來徑
一片桃花紅
日煖草漸長
雨餘泥乍融
春光添幾許
畫閣倚東風

挽趙雪蓬

白頭蓬戶抱遺編藥肆藏名七十年千首文章留海內
一生韋布老江邊置芻客有南州士負郭貧無下溟田
誰續真州耆舊錄好將軼事爲君傳

送鄔超然

撫劍不適意樓前驕馬嘶臨風一揮手獨去薊門西淺
水魚難得長松鶴始棲期君在何許隔歲蚤鶯啼

寄酌亭

胸山城下柳離別昔年心揚子江頭月相思此夜深近
懷宣尺素遠道托瑤琴南國秋風蚤胡爲久滯淫

留別許嵩陽表兄

世路崎嶇歷苦辛當筵數語見情親生涯笑我餘孤劍
知己如君復幾人千里松楸燈下淚廿年萍梗客中身
從今得遂還鄉願感激臨岐倍愴神

阻風青山

晨起風打頭向晚勢轉大遙觀青山顛浩浩飛壩堞波
濤聲嘈呖船頭肆掀簸客子俯首歎長年袖手坐抑鬱
掩篷窗去住兩無那日闕東下舟何止千帆過吾楫豈
不良時乎偶相左終當乘長風萬里巨浪破此意誰共
論孤吟仍自和

木元堂詩集 卷三
○黃天蕩

舟行阻石尤。三日未得放。宵來旗角轉。乃至黃天蕩。混
茫連長空。天地入俯仰。星漢出其裏。元氣彙萬象。當年
韓蘄王。血戰氣慨慷。兵少力不支。火箭著五綱。哀哀古
戰場。國殤颯精爽。至今波濤間。百怪窮象罔。是時夜無
月。天水互明朗。鬼雄騎大魚。荷戈激流上。青燐持作燈。
從之夔罔兩。聚散迭隱見。叫嘯歛來往。篙師手指口。魄
慄不敢響。予時方對酒。憶古結遐想。推窗一酌之。高歌
扣烏榜。

○舟中望攝山

一峰撐碧峭。峻嶒傑閣飛。樓占上層地。冷未消三日雪。
雲深疑有六朝僧。孤舟此際虛游屐。仄徑何人拄瘦藤。
回首山靈仍自笑。題詩聊復記吾曾。

○登雨花臺

建康城畔雨花臺。形勢居然四望開。獨客偶憑高檻立。
羣山爭擁大江來。香銷北里羞名士。人去南朝想霸才。
撫劍長歌重回首。怒濤空卷雪成堆。

○采石

采石長江水。滔滔萬古新。當年江上月。曾照謫仙人。巖
谷猶如昔。風流不可親。惟餘一抔土。常與謝家鄰。

。泊蕪湖

城郭標形勢孤懸澤國邊暮雲吳苑樹寒雨楚江船寂
莫漁垂釣喧呼吏索錢上游興廢係細數六朝年

張睢陽廟

在灣址鎮

華清舞妖狐昭陵趨石馬哀哀老哥舒痛哭潼關下兩
都已不守唐室若崩瓦偉哉真源君奮臂捍中夏至今
江淮間歆祀徧郊野我行過宣州崇祀煥丹楮入門瞻
須眉英風起尊竿傍配許太守比肩坐高厦睢陽泊偃
師兩地碧血灑事後互謗傷疑案惑聾啞子弟尚不信
况乃悠悠者悲來薦溪毛再拜淚盈把

桓公嶺

在涇縣

夕陽下西麓當路兩山夾初登猶寬廣漸上轉窄狹行
行四五里僕夫坐仰脅捫厯涉其顛我足亦困乏當年
峻約徒流兵此剽劫桓桓內史秣馬厲戈甲遺恨斷
要領碧血殷截業千載芳躅在猶足起懦怯崩厓帶餘
勁怒欲向人壓夜深人蹟稀但與猿鳥狎素蟾騰林表
塵鏡乍開匣來朝指前途羣岫碧空插

。桓公祠

宣城內史此勤王遺廟真流百世芳一死能從君父難
九原應恨子孫狂居人伏臘仍香火牧豎郊原話戰場

木石言集 卷三
翰與東山謝安石階前玉樹悉成行。

○箸嶺

一嶺界宜歛。突兀浮雲齊。履底千萬峰。不敢爭高低。細路如秋蛇。盤迴接飛梯。壁立緣青空。蒼蒼烟霧迷。嚴冬十二月。客子行攀躋。夕陽墮前山。妖鳥窺人啼。巖罅生腥風。夜有猛虎棲。異景豎毛髮。顧視色慘悽。積雪山之陽。半化爲冰澌。懸厓已難援。况復多水泥。奮臂攀藤蘿。側足踐蒿藜。跬步偶失度。下乃百丈谿。陟險理則爾。顛覆寧排擠。傳聞汪越國。鑿此通征鼙。未審仄徑中。何以容輪蹄。野語半雷同。事往莫可稽。題詩紀游歷。排募驚

昌黎

○初至家有感

伯仲歸來千里餘。眼中風物轉蕭疎。故園耆舊成荒壠。喬木先人有敝廬。白髮尚堪娛老母。青箱何處問遺書。擬將築室荒田側。十畝春煙日荷鋤。

里中雜詩十首 并序

余兄弟生於胸海歸里時耆舊凋謝往事多就湮沒。搜訪閱月凡家乘所載宗族所傳及摩挲碑碣而得者悉著於篇聊備遺忘非敢以爲詩也。

海上勞生廿四年。今朝始到故山邊。村荒邑乘難詳載。

遺事聊從古老傳

憶從顯慶判山城梓里棠陰最愴情父老尚能歌舊德

可憐谿水至今清始祖別駕公諱安唐顯慶初自餘杭來判歙有政績載在郡志卒遂家焉

數椽舊是弭歌地寥落松篁冷夕陽剩有三橋居士筆

燕泥零落輔仁堂五世祖刺史公季父善人公建文會於村南為子弟族人讀書之所堂各

輔仁為文壽承書左曰不窺園右曰來青軒其後築臺悉種梅花有松數株大可合抱

小閣猶存曲沼平當年雙鳳舊知名祇餘故額空塵土

誰識吳門百穀生刺史公及太常公明萬歷壬午戊子相繼登賢書公車北上吳人王百穀

書雙鳳館三字以贈歸構別墅讀書其中今故額猶懸於門而宅已為族人所有

比部分符守夜郎力堵水藺捍危疆烽煙甫靖身旋死

萬里忠魂泣點蒼太常公諱子儉刺史公仲弟明萬歷戊子舉人天啓初由刑部郎出守曲

靖道經貴陽值水西安氏之變遂留守禦城全身殞贈太常寺少卿

怡怡誦讀共幽棲小構傳聞俯瞰溪莫問臨清棲舊址

雞豚成隊菜成畦臨清棲先高祖東里先生兄弟讀書處也故址尚存今廢為種菜地

英風毅魄滿乾坤異代聲名萬古存不特六忠祠畔路

歲時伏臘走諸孫六忠祠在溪側中祀宋待制公唐佐明太常公子儉尚書公義渠侍郎公

駟御史公潤生刑部公世韶內侍制公休寧人尚書公烏程人

梅山春草接蓮塘處處松楸半已荒不是含辛歸負土

誰捫殘碣到平岡五世祖墓在蓮塘高祖曾祖墓皆在梅山太常公墓因無後已迷其處再

四尋訪始得之於近村荒烟蔓草中殘碣猶存

七寶莊嚴九品蓮小龕踈磬兩悠然客來夜半塵緣寂

溪水無聲月在天水月境在輔仁堂側中供觀音像

雙溪左右抱村斜村帶垂楊五百家待得春深齊拂水

綸竿篋笠送生涯雙溪垂楊最佳長條碗地閭邑所無

來青軒夜坐

向夕掩關坐寂寥無客來中庭明月上照見梅花開

辛丑

深渡

客子溪頭晚放船緩搖雙槳下長川一灣流水清見底
兩岸亂峰高刺天餉婦攜筐迴舊袖村翁賽社斂青錢

香醪莫惜頻沾滿今夜蓬窓趁醉眠

米灘

新安水錯出百里始同派其下有巨灘重險天所界大
石截流立衆水共爭隘老龍伏波底掉尾弄光怪爪鬣
騰之而歎薄激滂湃舟行偶不慎觸之立摧敗榜人面
如土力盡不敢懈貫索百丈牽攢篙十夫憊船底薄於
紙性命寄纖芥同行三數人顛悸起再拜我獨驚未聞
酌酒賞奇快人生宇宙間太倉一稊稗忠信吾固有波
濤豈足戒既醉險亦過慨焉發長喙舉杯示彼曹茲游
庶豪邁

淳安

舟過淳安境春流沒漲痕亂山森似戟僻縣小於村錦石游蹤杳青溪戰壘存欲尋皇甫蹟新月又黃昏

謝臯羽墓

南渡山河作戰塵獨攜如意向江濱登臺自哭文丞相
抔土誰憐宋逸民斷蘚久封碑字古野花時傍墓門春
惟餘晞髮新詩句留與行人一愴神

過富陽

江波浩蕩白鷗閒夾岸晴峰擁髻鬟十載摩挲圖畫裏
於今親見富春山

錢塘江

淞水過富陽其勢乃漸寬羣山四散開現出白玉盤春
雪將次消百頃波漫漫五日山中舟半確經危灘今始
豁眼界浩淼縱大觀微風起天末淡沲生晴瀾雁鴻或
上下鳧鷖時往還枉渚望不窮遙峰秀可餐信哉山水
區瀟灑非人寰安得買簑笠於此垂綸竿黃帽笑語我
此是春時看恐君或未知七月八月間儻來觀秋濤崔
嵬如銀山

○辛丑正月二十四日過杭州易舟將發倉卒中借

猶子嘉錫放棹西湖僅半日許歸途依依猶覺

清暉之戀人也

廿載天涯結夢思。今朝真見放船時。春生南國應無價。人到西湖定有詩。細雨已催冰做水。好風將放柳成絲。何當重作探奇客。預向青山訂後期。

過平望

濺濺流水淨無沙。兩岸疎籬整復斜。微雨暮寒將變雪。野梅春淺未成花。輕帆郢客欵烏帽。小舫吳孃隔絳紗。滿目風光任吟賞。劇游豪興一何賒。

吳江道中

風流當日順陽公。曾解吹簫贈小紅。寄語東風休作雪。

扁舟今夜過垂虹

虎邱雲巖寺

吳門登覽興初濃。禪榻逍遙訪舊蹤。高阜尚傳金化虎。曲池無復劍為龍。一簾碧影沿芳草。滿徑蒼陰蔭古松。行到上方幽寂處。塔鈴遙答暮天鐘。

滄浪亭

吳越江山興未闌。滄浪亭下又盤桓。高才自不能諧俗。飲酒何曾解罷官。澹澹花陰春弄影。蕭蕭竹色晚生寒。寂寥詩客今何在。俯首斜陽一倚欄。

無錫道中

雙槩搖開兩岸冰。斷雲明處塔層層。幾程碧樹辭吳會。
一路青山到晉陵。門巷臨流繕蠶室。人家隔岸曬魚罾。
惠峯泉水清如許。欲著芒鞋苦未能。

○魯子敬墓下作

在丹陽

蒼涼蹲石獸。左右蔭松樹。峩峩三尺土。傳是魯公墓。當
塗昔逐鹿。豚犬望風附。百萬江陵師。天塹欲飛渡。吳兒
仰面啼。膽裂敢相忤。時公方少年。按劍勃然怒。一呼公
瑾來。定策非細故。赤壁奮蹴踏。鬼域走無路。熊熊江之
東。王氣自此固。借劉以樹黨。能令老瞞懼。九鼎未遽窺。
稍稍延漢祚。何人詆粗疎。猥哉張子布。我來馬鬣下。憑

眺生企慕。狐狸不敢穴。疑有精靈護。呂城亦在茲。過者
不一顧。

○渡江望金山

大江赴溟渤。其勢莫敢對。金山一片石。故作倔強態。屹
立當洪濤。昂然不少退。亘古流不去。下有巨鼇戴。古刹
何崢嶸。峰巒隱其內。雕甍接飛檐。金碧炫螺黛。

翠華此經過。山靈被優賚。

宸章煥標題。光芒照萬代。中流肅瞻視。卿雲現駿騫。廣
廈千萬間。緇流數百輩。浮屠高七級。上與太空礙。傳聞
登極頂。江天得勝槩。何當持綠玉。高控黃鶴背。

校禮堂詩集卷三

校禮堂詩集卷四

歛凌廷堪次仲撰

壬寅

○錢唐廉吏行爲山陰童丈二樹作

錢唐廉吏高景蕃歿後九棺不得葬見夢於童童畫
梅十幀售以葬焉

白楊何蕭蕭北風聲正悲北望北邙山邱墳鬱纍纍十
歲讀詩書二十舉賢才三十作縣令吏民不敢欺四十
作刑官五十作監司不得上官喜獨結

天子知六十晉鴻臚七十奄忽歸同里老吉士隧石作

銘辭九棺不得葬。廉吏不可爲。賢者讀銘辭。太息相徘徊。愚者讀銘辭。淚下如縷縻。山陰童布衣。夜輒夢見之。冠纓紅木難。黼黻垂裳衣。正氣軒須眉。堂堂方兩頤。龍須十幅紙。幅幅生光輝。慘沮前致辭。乞畫十幅梅。周南有山長。晨起往告之。山長聞此語。沉吟若有思。鄉有賢大夫。二十舉賢才。三十作縣令。吏民不敢欺。四十作刑官。五十作監司。六十晉鴻臚。七十奄忽歸。九棺不得葬。請視吉士辭。布衣坐小閣。大筆何淋漓。筆筆大秦珠。幅幅珊瑚枝。洛陽貧太守。拙宦被議歸。囊出清俸錢。買此十幅梅。畫軸卷贈我。持此作葬費。山長謝布衣。太守助

布衣洛陽十萬戶。交口頌布衣。山長持錢歸。買地南山陲。上樹松與栢。下逐狐與狸。九棺一時葬。行人相歎咨。作詩告行人。不用相歎咨。南山有時爛。高誼永不移。

中秋泊美人灣

蕭蕭天際雨。初收浩浩河。干水急流日。暮碧雲風卷。盡美人灣畔度中秋。

自高郵至寶應

兩城懸澤國。錯壤巽湖邊。民以堤爲命。帆隨水到天人。家三版屋生計。一池蓮不見孫莘老。推篷意惘然。

淮以南數百里。無片石累日。舟中意殊不樂。戲作

夢遊蜀道歌以自廣

蠶叢有國名華陽千山萬山森劍鋸披圖覽記足未到
側身西望心傍惶鳩來淮南地寬廣部婁纜高三四丈
蕭疎滿眼不稱意雲棧飛梯勞夢想鳥道一綫天邊懸
有蝶導我登其巔跑風巴馬疾於鳥下視雍梁兩點烟
劍門劍光半天燭對插奇峯萬靈伏歐冶聚得六州鐵
鑄作純鈎鎮庸蜀我來拔出雙蛟龍上下刺擊驚猿公
瑣瑣恩讐那足報會須持此臨崆峒迴看萬里岷江瀉
翠羽明珠衆靈迓邀我乘雲游太清手把芙蓉傾玉斝
學仙學劍俱無成枕上忽被秋笳驚覺來啓戶看蒼翠

莽莽長淮如掌平

○讀元遺山集

神京喋血竟生還忍死重過石嶺關一寸秋豪成野史
百年老淚灑空山身經北渡流離際才與東坡伯仲間
文獻中州盡凋喪賴君大手紀完顏

渡黃河作

九河湮故道河勢日南趨豈曰難疏鑿多緣賴轉輸下
游平易潰上策古來無佇見安瀾處蒼生仰
聖謨

宿王家營

行李初登第一程荒村燈火客心驚長河東注雄無敵
秋色西來夜有聲千里荒塗憑馬迹三更茅店感雞鳴
不堪匣劍牀頭嘯襍被霜寒夢未成

發衆興棄驢坐牛車上

隄邊柳榦雙極立道上車蹤一尺深乍喜山川開眼界
不堪塵土浣衣襟蹇驢無分添詩思健犢猶能起壯心
珠勒雕鞍成底事幾時走馬杏花林

順河集

莽莽平沙合荒村策蹇過農功資赤墮禹力在黃河官
道多栽柳人家半隱蘿秋原衆年少猶唱大風歌

五花橋圯於水行者咸以舟渡舟人言水自駱馬

湖來由沐陽下海州也聞之悵然

我本黃海民寄身滄海旁滄海非故土而我生是鄉里
閉舊兒嬉厯厯疇能忘所以浮屠氏不肯三宿桑况復
小人母白髮垂高堂四載事遠游道路徒奔忙今年又
驅車北走燕趙疆道經五花橋橋下水湯湯舟人云此
水東流下胸陽水中有鯉魚修鱗尺半長不寄一封書
使我心茫茫

○晚抵紅花埠

斜陽滿地柳毵毵袴褶弓刀味漸諳一路青山爭送客

銷魂已不是江南

傾蓋亭

路出問官里空亭傍古城碑從何代建蓋向此間傾有
客徘徊久無言感慨生如新頭白者應愧昔人情

夜至李家莊

片月浮雲裏微茫路不真餓鴟聲似鬼怪樹影如人氣
以豪游壯詩因險境新行行沂水近明發問前津

渡沂河

石瀨舟難泊黃郎負客登中流沙漸露兩岸土全崩波
暖雀爭浴水清魚可嘗傳聞春漲發萬馬勢奔騰

過大峪厓

當路懸厓立稜稜百丈高仄愁車軸折險仗馬蹄牢蘿
薜牽衫袖塵沙損佩刀俯身矜脫轡捷下亦云豪

青駝鎮道中同張秋堂飲村店

苦竹搶籬茅蓋屋葺麻葉大棗初熟山中一雨秋更濃
無數嵐光侵馬足小店青帘絕點塵舉杯同醉甕頭春
鴉鬢十五當壚女半掩蓬門學避人

蒙陰縣

蹀躞荒城下西風灑面塵路遙行子倦縣小長官貧秋
影馬頭樹夕陽牛背人東蒙山色好天際黛痕新

8 高堂生墓

七雄既龍門。禮壞不可收。况經秦火後。無復織豪留。堂
堂高堂生。斯文守姬周。淹中十七篇。保護同琳瑯。逸禮
三十九。已共煙雲淨。先王制作心。賴此懸千秋。奈何後
之儒。排擊來相讐。置之不立學。宋人乃其尤。六籍缺其
二。誰復加研求。割訛以配經。茲論亦謬悠。我過新甫山。
高墳峙松楸。再拜不能起。涕淚涔涔流。議禮如聚訟。折
衷知無由。回首驪山下。金棺狐兔遊。

新泰重陽

梁父山頭日影微。西風和冷上絺衣。土惟白壤民知力。

鞠有黃花客憶歸。沙路漸諸驢背穩。江臯空羨蟹螯肥。
眼前賸得題糕興。輸與南雲自在飛。

羊流店弔羊太傅

阿童銜刀遊渡江。今年青蓋入洛陽。天開石馬一寰宇。
誰致此者太傅羊。爰精既滅當塗篡。緩帶輕裘鎮襄漢。
不辭良藥活敵人。笑挈吳兒掌中玩。當時全晉恢雄圖。
何難百戰平勾吳。豈知智士用心異。要令恩澤淪肌膚。
平將赤心置人腹。死後三年定南服。請看峴首峙豐碑。
晉人墮淚吳人哭。道傍蒼鵝飛上天。長安宮闕成灰煙。
南浮五馬民不叛。王氣猶餘二百年。萬騎臨江不敢過。

始信從前慮遠大小兒拔齒快一時以力服人計誠左
君不見六十萬衆荆楚開麋鹿夜走章華臺五嶺甫營
三戶渡阿房徒取後人哀

望泰山

天際真形出巖巖氣脈長三公尊上秩萬古鎮東方遠
道艱梁父雄才憶漢皇詰朝攀日觀濯足瞰扶桑

岱廟

臺殿巍峩入杳冥頭門雲氣護金扃冠裳自昔朝羣后
雷雨中宵謁萬靈巨石浪傳秦代斲豐碑猶勒漢時銘
碧霞深處頻回首齊魯迢迢未了青

望徂徠山

鬱鬱徂徠山拔地摩蒼穹翠色永不凋上有千年松屹
立泰岱傍勢欲吞羣峰儼然小國君不肯作附庸昔者
四七際琅邪起樊崇赤伏龍門野此地成盜叢何年倔
強姦化爲文章雄會傳竹溪邊太白留遺踪又聞石守
道慶厯推鉅公我來望巖谷往事皆成空賢愚兩不知
但見青濛濛何時駕雲車絕頂鞭長虹喚起山頭月照
我太古胸

党竹溪故里

奉符山色青嵯峨汶水環抱山之阿竹溪仙去故里在

山川憑眺悲如何。百年人物中朝望。落落雄才氣奔放。高文不獨冠金源。小篆猶能逼秦相。武元射蛟江水中。爾時文治猶未隆。采石江頭孽龍死。中都王氣方熊。興陵受命開鴻運。卅載人稱小堯舜。唯公珥筆侍彤庭。鋪張功德陳謨訓。同朝更有王黃華。爭杼藻思紛天葩。雅雅魚魚壓揚馬。秋山春水隨變車。治亂興亡翻覆手。可憐紅袖中原走。蔡州城下哭遺黎。止有文章名不朽。一時南北兩奇人。坎止流行各有因。應笑江東辛棄疾。空將辭賦作陪臣。

發肥城口占二首

城頭初日影遲遲。縣宰棠陰盡有碑。獨愛躋寧胡與魯。至元癸未勸農詩。元濟寧路與魯總管胡少中有至元癸未勸農四首勸縣署壁上空山浙瀝泉爭落。廢蝶荒涼草亂生。拂拭吟鞭仍自笑。驅將瘦馬過肥城。

宿長清白雲閣

恐人白日狐狸嘯。到寺黃昏蝙蝠飛。滿地月明僧不見。老松橫影入禪扉。

嚴相公廢祠

在長清祀元將嚴實

斡難河上五雲新。開國功名屬武臣。草昧能收文學士。英雄自識帝王真。蕭條故壘成千古。憑弔空祠定幾人。

欲訪遺山舊碑碣不堪殘址徧荆榛

○齊河懷古

赤符天子重高勳回首南宮日暮雲不信祝阿秋草外
至今人道耿將軍

鏡龍八載帝中原會築孤城濟水邊鱗角未全成底事
殘碑猶紀阜昌年

德州道中

驅馬來屯事臨風一慨然山川空此日戰伐已當年大
路西通趙長河北走燕地衝徭役苦端賴長官賢

○平原行

妖星夜照軋犂山漁陽鼙鼓驚天關平原太守奮戈起
捷書如羽飛長安天子茫然愕相向不識真卿作何狀
二十四郡豎降旛一臂能將河北障少年幕下真英雄
指揮河朔如旋蓬一門忠義照青史斷舌更有常山公
由來翰墨因人重凜凜千年毛髮動援筆曾爲乞米書
摩厓更勒中興頌鬲津河畔秋草黃過者涕淚雙滂滂
八十老死天不許要令氣節光皇唐叛臣希烈何足數
可惜千鈞發鼯鼠當時誰人爲此謀盧奕生兒非幹蠱
嗚呼昌黎片語成德驚廷湊北面尊朝廷人生有幸有
不幸駐馬爲作平原行

○董仲舒祠

獨抱公羊學千秋仰大儒漢廷三策最越國一仁無繁
露墜延際玉杯空座隅如何丞相貴但用牧豬奴

○河間獻王墓

一炬斯文盡遺經出漢初賴茲朱邸力得保素王書梁
苑才安在淮南術已疎卽今三尺土持較復何如

○鈎弋夫人歌

趙家有女好顏色時來嫁與秋風客一尺桐偶死泉鳩
小車夜召田千秋雙手如鈎待君理養得佳兒作天子
宮中空號堯母門年年風雨啼冤魂世人但知君太忍

那識英雄清禍本不見後來拓拔家聯臂空歌楊白花

路見菊花

風塵于里賦遘征一見黃花眼倍明記得去年風雨際
故人同醉廣陵城

○河間城北三十五里有地曰毛精壘相傳爲漢毛
公塋處胡稚威撰河間縣志謂金末賊毛積元
末賊毛貴皆嘗掠河間壘以毛名非積卽貴非

毛公冢也

祖龍一火六籍殘厥初傳詩齊魯韓源流未真異師說
毛公嶽嶽生河間大小二序自子夏孔門一綫天爲完

詩人美。剽不易。曉賴此。猶可等。其端事。久論定。置博士。皎日既出。燭火寒。康成作箋。傳萬古。縱有異論。誰能干。何人載筆。逞臆見。聖經等作。淫辭看。我行武垣。經故壘。秋花照地。紅爛斑。居人云。公葬茲處。遺址不見。沙漫漫。或言金元積貴。亂劇盜。曾此相鈎盤。壘名之起。或以此。未必漢代理衣冠。我聞此語。大驚愕。下馬審視。空長歎。千年河朔。用武國。習俗勤悍。人民頑。報讐任俠。競相尚。經術掃棄。同榛菅。卽今抔土。姓氏在。尚冀力挽頽風。還柰何。憑空肆穿鑿。使冒賊號。增厥姦。作詩爲告。郡耆舊。時率子弟來游觀。年年封殖。慎勿壞。一壘之重。如邱山。

○過趙北口四首

融融波影映樓臺。夾岸疎花煖欲開。怪底深秋春似海。前年此地

翠華來。

釣船多在板橋西。漠漠遙天入望低。垂柳萬株堤一道。綠陰分破碧玻璃。

趙女如花鏡裏懸。黃塵吹盡水澄鮮。并刀應比吳刀快。翦得湘中一幅天。

蘆花頭白蓼花酣。萬頃晴波倒蔚藍。寄語垂虹老桑苧。燕南風景勝江南。

癸卯

題吳上舍讀易圖

羲文世不作。大易遂渺然。堂堂魯宣尼。十翼絕韋編。秦
 人烈火餘。幸用卜筮全。炳耀天地間。祖述賴後賢。商瞿
 游聖門。田何乃真傳。吉凶雜災祥。焦京母乃偏。流傳至
 東都。折衷來鄭子。王弼年少子。安共莊老詮。唐初作正
 義。專主其說焉。餘風被宇宙。漢學如飛煙。何來黃冠師。
 忽出先後天。手畫太極圖。佐之河洛篇。諸儒尊於後。濂
 溪信於前。遂以道家流。加諸爻象先。學者習其非。於今
 七百年。吳君聖人徒。獨抱遺經研。陰陽玩消息。健順參

坤乾示我讀易圖。方寸百感煎。放筆題數語。狂疾不可
 痊。詩成出相質。為我破愚顛。

古意二首上翁覃溪師

小草生田間。荆榛相蔽虧。托根在賤地。作花何足奇。田
 夫既不顧。采擷終無時。敢望雨露及。常恐纒耨施。一朝
 見君子。謂是蘭蕙姿。移置通都中。殷勤灌溉之。草木豈
 忘情。芳馨日以滋。何時紉為佩。以報幽人知。

威鳳丹山來。萬里翔元圃。雲霞麗五色。文章照千古。從
 遊皆鸞鶴。不與凡鳥伍。巖下有山雞。顧視矜毛羽。欲附
 鸞鶴飛。含情不敢語。自慚兩翼弱。未足致高舉。鳳如不

識察脈脈終自阻矯首望青雲朝朝鏡中舞

和作

大興翁方綱 覃谿

據梧與杖策等是無成虧滑疑寓諸庸堅白何足奇
圈枿合比竹封豨非識時萬籟叩南郭五車漫惠施
匠氏爲占夢忽逢梁棟姿造物磊砢氣一笑偶共之
風露一會合礪谷交液滋夢中喻用語瞬睨焉得知
猗猗琅玕寶下照瑤瑤圍節足相應聲黍尺嗟曠古
奇律不易逢崑邱漫爲伍相感聽和平非關炆毛羽
天閭日五色綠樹春鸞語矢音母自輕矯翮試高舉
遵陸儀旣成中沮洳焉阻噬肯惠昕夕飲食式歌舞

客有以萬壽寺僧七松圖索題者書此應之

空山夜聚龍蛟螭聽經競繞人天師寶錫一響衆山應
迷者遁走悟者化作枯松枝曉來跌坐手加膝數之其
數適得七或俯或立如行童齊受毗尼真戒律天風吹
松松有聲阿師心似琉璃明此身已幻畫更幻不妨借
畫開無生對面相看不相識默如雷霆語牆壁本來面
目知是誰舌上青蓮飛霹靂昨者有客示我此畫圖夜
夢蒼顏紺髮七丈夫正容肅我坐於上觀彼同拜金淨
屠覺後聞鐘心自喜悠然頓悟楞嚴旨向汝團蒲試叩
之可能干偈如翻水松乎松乎吾故人阿師日與松相

親他年祗樹林中再相見會看寸寸生龍鱗

宋漫堂中丞重雕宋本施注蘇詩乃邵青門所改
竄者原本殘蝕斷爛僅十之七中丞裝褙藏篋
自他山所見影寫本後世久不知有真鼎乾隆
癸巳翁覃溪師以十六金得之燕市舊題曰注
東坡先生詩款書吳興施氏吳郡顧氏有毛子
晉及宋中丞印始知世所行者非真也癸卯二
月出以見示命廷堪作詩題於後

大峩仙人今古無筆驅萬景如驅奴真宰上訴天已怒
况復著手箋其書六丁下攫雷電走鉤元抉奧歸烏有

猶存蠹簡落人間施顧姓名均不朽重開注本自漫堂
開鑪再鑄半段槍至今舉國傳魏冉不知更有咸陽王
吾師矯矯金閨哲八載衡文住南粵應是坡仙幻後身
重向南荒吐雄傑真本市上偶見之古色照眼青離離
失喜不惜典衣買摩挲珍重同鼎彝昨過蘇齋取示我
零落縹緲逃劫火鬼物守護失搗訶斫斷蛟龍碎金鎖
歸來輾轉夜不眠匣中寶劍光燭天終當生剖蠹魚腹
搜取殘文續舊編

癸卯二月洪素人比部出守順德覃溪師以所藏

成化七年順德守黎永明所范銅爵贈行兼送

以詩屬廷堪和作

黎侯昔爲順德守。趙人愛之如愛母。修舉禮樂興庠序。明德馨香生瓊卣。劫灰零落三百載。一爵依然脫塵垢。老苔駁蝕土花生。忽入玉堂揮翰手。幾年什襲篋衍藏。未肯輕將示賓友。西曹楚國校士回。譽滿千人萬人口。股肱大都需良吏。一麾又繼黎侯後。離筵不惜持贈之。古色稜稜照杯酒。欸識猶存成化年。座上羣公傳玩久。乃知微物因人重。金玉區區非匹偶。不然一器何足奇。直與循良同不朽。朱幡曉發春明門。冉冉旌旗照花柳。嘶風大道五馬驕。父老歡迎羣吏走。上下肅肅清風來。

夜夜歎雲動星斗

程彝齋招同王石曜工部小集

在昔東原氏。曾將漢學論。二君能入室。六藝得專門。著述書盈笥。諧談酒滿尊。晴窗忘晝永。重與溯淵源。

聞洪素人太守訃二首

讞獄懸秦鏡。衡文得楚材。朱幡剛北指。丹旆遽南來。對酒情如昨。題書忍更開。遙知襄國路。父老不勝哀。索米長安市。曾分清俸錢。我邀知己重。人愛使君賢。回首成千古。分襟甫半年。墓門何日拜。灑淚望江天。

校禮堂詩集卷四

校禮堂詩集卷五

歛凌廷堪次仲撰

甲辰

甲辰二月至揚州金棕亭先生招飲兼贈二律即

席次韻

一鞭初自薊門還
憔悴風塵客子顏
未傍螭頭瞻北闕
却騎驢背別西山
文章造命原如此
貧賤驅人亦等閒
慚愧先生曾說項
殷勤仍為掃柴關

蘇門才士聚東南

謂覃溪師

上客慚居玳瑁簪
秋水伊人情

未遠春風歸路夢
猶酣受恩真覺微
時重得解須從悟

後參今日竹西重話與尊前又見月初三
誰莊圖爲葉詠亭丈作

以馬不若以非馬以指不若以非指物論區區那足齊
其分也成成也毀誰莊居士天爲徒半畝小築城東隅
亂峯當窗水周戶古栢溜雨蒼髯須披圖恍坐青山下
舉世誰爲達觀者所居不惜以誰名庇寒乃構千間厦
昔者齧缺窮王倪物所同是惡能知民畏濕寢惴木處
鱗以爲國後安之始知恢詭漆園吏卮言寓言均未至
太山本不敵秋豪妄將人我分爲二我亦飄蓬東海邊
買山終日羨歸田何時卜宅烏聊畔靜讀南華第二篇

夏日感興

綠陰深處亂蟬鳴望遠無端客思驚已悔暫爲齊贅壻
可堪常作魯諸生瑤琴此日彈應倦金線頻年壓未成
底事廣陵佳麗地照人惟有月多情

○甲辰去揚州阮伯元賦詩見送作此答之

我年二十餘海上守寂寞朝夕研故書所得良足樂頗
怪唐後儒蔑古太穿鑿千載訓詁傳棄之士苴若後學
相傳染其病不可藥說詩詆毛鄭講易尊河洛尚書古
文雜麟史三傳削至於古禮經居然置高閣但取小戴
記輾轉相附託譬之書大傳上將壁經攬高談性與命

此外皆可略。求遠先舍近。守約畏求博。我見雖如此。深恐識未擴。出門求友生。所遇多落落。持此語向人。掩耳輒走却。今春來邗上。飢寒守空橐。眼底忽逢君。不異雲中鶴。共語三日夜。解衣肆盤礴。刀解庖丁牛。斤去郢人堊。新秋我北上。與君乍離索。君賦送我詩。深情具盃酌。謂我他山石。可效攻玉錯。君才大如海。秋風振鵬鷲。一舉翔萬仞。塵世仰寥廓。著述信可娛。事功亦不惡。他日倘同登。毋忘貧賤約。

元作

儀徵阮元伯元

壯夫不讀書。百年太寥落。所患無師承。辨逕多岐錯。

指日乃扣槃。問天或捫籥。所聞皆布鼓。所見亦火爨。凌子來揚州。其學無垠壑。時時出緒餘。爲我啓局鑰。書陳安國僞。易斥輔嗣鑿。與義尊荀虞。廣圖黜河洛。讀史魏金進。論統晉宋削。更借叔然法。和我舌與嚼。倚聲與顧曲。亦至析微漠。具識無差池。持論少迂澀。况以居相鄰。往來盡脫畧。案盤具疏食。卷帙雜盃酌。篝燈談轉清。風雨響簾幕。何當說遠行。忽忽意無著。昔賢拜責言。孤陋感雜索。惟思雙鯉魚。素心或可托。握手更贈言。持爲此後約。親老家復貧。相將縻好爵。

乙巳

乙巳二月初七日

皇上親臨辟雍講學禮成恭紀二十韻

七曜遵乾度三登肇太平濺汪

恩溥被巍蕩

德難名斂福羣黎壽宜威四海清萬年

皇極建二月辟雍成玉鬯頒

天府金錢發水衡直過殷右學不數漢東京取象詩箋
璧徵文禮注明涵雲波影細映日浪紋輕特

詔乘春令親臨率上卿六龍扶

寶輦雙鳳導霓旌博士橫經侍儒臣載筆迎綠楊風乍

展紅杏雨初晴仙丈彤墀擁鑪香

御座縈祠官陳俎豆協律奏咸英經義紛綸出

王言辨析精說書標善至演易法天行重譯梯航接盈
階劍佩鳴駿奔周庶尹鵠立魯諸生

聖學高千古

皇仁徧八紘蕪辭同擊壤載拜矢丹誠

8 學古詩二十首

廷堪甫毀齒出就外傳受四子書粗識句讀而已少
長習商賈久之鈍如故乃學吟詠爲人傭書日月逝
矣而德不修也年屆三十闕市借人稍稍有所窺爲

學古詩二十章 論禮數章係三十外作今併錄入

憶昔學語日出就童子師。迫使讀大學百讀百不知。及長服商賈。自廢身中時。辛苦竟朝夕。僕僕爭刀錐。棄去勤誦讀。學為古文辭。奔走風塵間。為人作嫁衣。頭顱漸老大。中心常苦悲。偶爾探經術。始覺從前非。聖塗雖未見。望望懼背馳。義理浩煙海。千載以為期。

西京傳禮家。二戴暨一慶。各有專門學。授受異塗徑。學官十七篇。博士肅功令。折衷今古文。偉哉高密鄭。別記說禮言。亦出德與聖。不過章句餘。雜引互相證。詩外傳韓嬰。書大傳伏勝。至今二傳存。不與詩書並。云何小戴

記乃較本經盛。譬諸跡迹臣。公然執國柄。願言尊聖經。撥使反之正。

民受天地中。不能無偏陂。聖人知其然。制禮以節之。其精原性命。其跡惟威儀。吉凶賓軍嘉。一一非矯為。優游就矩則。大道自可幾。復禮聖所訓。約禮賢所希。不聞於此外。別詡神與奇。後儒畏繁重。翻謂不足治。自遁於虛寂。穿鑿多支離。舍禮而談理。語錄空費辭。

鄭氏注羣經。易禮兼詩書。擇言粹且精。七緯均刪除。其書半在亡。存者為可誣。周官非禮經。戴記亦漢儒。紛紛傳記家。醇雜原分塗。明其次於經。始以圖讖俱。末學等

視之。不識經傳。殊集矢向前。哲出口成。妄愚。詆者固庸。謬辨者亦拘虛。非所議而議。撼樹徒區區。

儒林序五經。周官未立學。班書藝文志。僅附禮家畧。蓋禮之支流。存以備探索。猶之書春秋。汲冢國語。若月令及王制。秦漢所依託。胡乃號三禮。辨名誠大錯。自從唐以還。二書爭述作。屈指注釋家。著錄滿囊橐。古經鄭賈外。學者日荒落。何當誘利祿。庶可漸疏鑿。

儒者不明禮。六籍皆茫然。於此苟有得。自可通其全。不明祭祀制。洛誥何以詮。不明宮室制。顧命何以傳。不明有司徹。安知楚茨篇。不明大射儀。安能釋賓筵。不明盥

與薦。易象孰究研。不明聘與覲。春秋孰貫穿。如衣之有領。如官之有聯。稽古異有獲。用志須精專。

大易贊天地。三聖遞闡揚。田何接商瞿。施孟非無名。真源紹述微。旁流起焦京。縱茂寄生枝。本根終難萌。况復王輔嗣。私智雜老莊。貞觀主其說。漢學遂以亡。賴有資州李泰山。拾豪芒。宋人生苦晚。去古益渺茫。太極泊河洛。蠡測空披猖。十翼尼父言。胡不細審詳。

逾冠讀尚書。始與四代親。孜孜論今古。區別僞與真。名物及象數。不暇勞心神。堯典禹貢篇。其學無涯津。敷土奠九州。凝績撫五辰。持此或問難。遜謝空逡遁。因思古

儒者精博真難倫。沿革考疆域。推步窮春秋。春仰不辨躔。次俯不知廣。輪冥然天地間。何以名爲人。

士生千載下。臆度千載前。於理縱有得。於事終懵然。詩人通諷喻。載之三百篇。善善而惡惡。各以事繫焉。不有大。小序微婉。何由宣。漢說雖紛綸。靡不承師傅。奈何信後儒。舊故等飛煙。棄置毛公傳。掎擊鄭氏箋。古人不可作。吾寧守殘編。

說詩主淫奔。盡人知謬悠。豈俟今之儒。喋喋不肯休。否則論古音。聲韻恣冥搜。議論日益多。實學日以浮。不知典與則。隨處皆可求。鹿鳴詠瑟笙。燕禮非無由。瓠葉飲

酒詩可考獻。酢酬俎豆及燔炙。器物密以周。舍此不講習。開卷張兩眸。鄭氏精於禮。故可垂千秋。

春秋出漢初。公羊始萌芽。嚴顏二氏學。各自稱專家。雖有左與穀。未立將柰何。况敢舍傳文。瞽說爭誼譁。慨自鄭司農。始操何氏戈。延至啖趙後。新義如亂麻。人人論褒貶。戶戶相譏訶。詎意聖人經。竟同法律科。三傳置高閣。玉川何太多。誰能界炎火。太息空咨嗟。

聖沒微言絕。道在七十子。苗裔徧天下。各各有撰紀。西京彙羣言。遂有戴氏禮。醇疵固不掩。均屬聖人旨。博士漢代官。不韋大賈耳。片言苟足采。乃與荀卿比。豈似宋

儒生吹毛論百氏高談表大中低眉講性理專門訓詁
學屏棄付流水

道非文不載文非釋難通字體苟訛誤流傳惑愚蒙爾
雅及說文力能匡聖功古者八歲後即使游其中自漢
逮汴宋猶未泯遺風淳熙變小學六書如枯蓬灑掃與
應對小子皆盲聾賴有漢碑碣尚足辨異同陋彼竈下
養但賞筆畫工

六書廢已久訓詁多闕殘一二篤信儒闡發誠艱難殷
殷考訂時亦擇心所安纖兒拾唾餘羣籍束不觀但取
許氏書閉戶施鉛丹六經所有字無不遭譏彈說文未

載者毅然信筆刪用力既不多已足驚愚頑等彼沽譽
念真見其肺肝宋儒論錯簡厥咎尚可寬似此僭妄罪
何止如邱山豈其許叔重遂掩周孔還

周衰異學興大道危將墜巖巖子居氏抗論辨義利同
時有荀卿厥功亦匪細法言中說文卓絕差可繼儒術
一綫傳千秋罕異議孰意南渡來指摘無餘地性惡荀
况黜美新子雲棄至於文中子亦負僭經累嗚呼聞與
洛遂與洙泗配道統固云尊恐非聖人意

更有談天衍倡論頗荒怪冥心天地初幻想九州外焉
知釋氏言非卽此流派彈指見大千須彌縮一芥語言

文字間觸處皆障礙。自非中有主罔不被其害。小智務高遠。轉謂吾道隘。機鋒逞聰明。儒宗妄參會。坐使聖賢旨。彼此互茫昧。寄語高明資。慎勿混疆界。

龍門論六家。獨推道精妙。旨趣雖無爲。要亦輔政教。神仙方技流。判然不同調。何年合爲一。借以極煇耀。至今黃冠師。不與初祖肖。服氣游太清。飛空躡雲嶠。寶籙驅鬼神。金丹養顏貌。妄言姑妄聽。未暇與之較。倘使老聃聞。粲然亦大笑。

史以載治亂。學者資考究。胡爲攀麟經。師心失所守。拘論正統脫。口卽紕繆。拓拔起北方。征誅翦羣寇。干戈定中夏。豈曰無授受。蕞爾江介人。弒篡等禽獸。荒淫無一可反。居魏之右。金源有天下。四海盡稽首。世宗三十年。德共漢文懋。南渡小朝廷。北面表臣構。奈何紀宋元。坐令大綱覆。免園迂老生。永被見聞囿。安得如椽筆。一洗賤儒陋。

文章無成法。達意卽爲善。高原萬里來。曲折隨地變。百家異趨向。各明已所見。胸腹苟無得。辛苦枉段練。文極自生質。時代遞相嬗。齊梁誇俳儷。天章五色絢。韓歐矯其習。遂爲不學便。入主出則奴。門戶競攻戰。吾心別有在。硜硜守經傳。

十五學吟詩。於今十餘載。雲霞工琢鏤。山雞耀文采。近始覺其陋。稍稍自後悔。昨來豁然悟。是中有道在。誠能具性情。一往衆理解。充學養以氣。事半功乃倍。宣德忠孝盡。紀俗輜軒採。白首操管客。推敲力疲殆。斤斤辨唐宋。平地起江海。書稱詩言志。此後庶幾改。

○孔撫約檢討過訪深談竟日

翰林聲望重東州。洙泗文章萬古流。周髀遺經傳趙爽。公羊絕學繼何休。眼分青白緣差等。手染丹黃爲校讐。秋草不嫌深巷滿。肯來尊酒話綢繆。

牛師竹先生以余與令子次原胡大樹思讀書辛

苦招游萬泉寺晚歸設饌暢飲卽席成詩

北風獵獵搖窗燈。對牀夜讀膚生稜。不分貴介與措大。三人一例成凍蠅。奇章丈人有深致。曉戒圍如促車騎。褐裘大呼來叩門。約訪城南萬泉寺。寒林有路曲曲通。老僧閉門芋火紅。周堂野水凍欲裂。仿佛人在玻璃中。歸來供具咄嗟辦。紅燭當筵羅獸炭。今朝何煖昨何寒。相顧听然一笑粲。爲憐勞苦羅珍羞。美酒不妨傾百甌。長安轉眼花如海。何日慈恩並轡遊。

丙午

送李載園明府之官保定同牛四次原作

李侯豪氣天下無十年遍讀琅函書一朝縮符作縣令
展布聊發胸中儲三十亭亭面如玉長安貴人爭刮目
平生珍重八斗才獨爲疎梅寄幽躅憶昔逢君花滿天
歌樓竝繫青連錢笑拂紫裘岸赤幘市人遙望疑神仙
名花一枝春一國我亦當筵醉吹笛別有娉婷吳苑春
等閒也露傾城色勝遊未已離緒生征車向曉辭春明
風流如君信不易作吏猶得依神京別離刺刺何須語
行見賢聲重畿輔袖中攜得薊門雲灑向花封作霖雨
銅章墨綬交輝光吏民嘖嘖稱循良但教人畏神明宰
不礙多情賦海棠

○懷阮大伯元

千里關河一寸心金臺歲月苦侵尋美人何處暮雲合
行子未歸秋水深落拓敢希方朔米相思慵鼓伯牙琴
別來幾度蕪城雨誰與挑燈論古今

曉起望西山有感作

時學時文
已一載餘

東坡望廬山但識面目奇身未入山中曲折何由知

哭章酌亭四十六韻

少小同里開嬉戲若弟昆稍長並讀書相近逾相親我
長君匝月事我如兄尊以膠投漆中寸步不忍分朝朝
共器食夜夜聯牀眠窮愁得密友亦復開心顏聞聲我

君愛望影君我憐方嫌百歲短願訂他生緣已春我出
游留滯鑿江邊綢繆乍別離相思浩漫漫愁心類春草
莫可等其端次年君取婦生兒嬌且妍中間隔數載懷
抱無由宣慰我尺素來語長意樸真時時夢見之如覩
天半雲未幾我挾書北入春明門君去我益遠兩地潛
酸辛年壯意氣盛謂富貴不難柔情不足惜小別不足
牽何期中道絕一旦成棄捐今年我下第秋風歸海壖
入門聞君耗痛哭傷我神譬如天邊鴻雙飛正聯翩矰
繳去其一慘絕安可論撫棺一長慟淚如江河翻君婦
抱遺孤述君臨終言君息如游絲輾轉床褥間異我一

永訣北望摧心肝傷哉情至語路人尚難聞况復君與
我其命同一身君貌哲而頤纖妍如美人君詩清而腴
澹澹如遠山君情深而長蘊藉如佩蓀收淚憶往事恫
悅驚心魂初疑傳者訛又若夢寐然凝視一斷絕雨涕
重汎瀾再拜奠生芻君前聽我陳生死雖異路情誼終
相連君子卽我子不必縈九原莫憂形貌殊但令精誠
堅浮屠如可信再結未了因生生長傍依世世加愛恩
金有時而泐石有時而剝陵有時而易谷有時而遷火
有時而寒泉有時而温惟我與君情萬古常纏綿

丁未

○小孤山

碧榭紅樓映玉顏。客帆初過小孤山。前峯雲重黛眉淺。明月滿江聞佩環。

○南昌使署聞翁二宜泉館選之信用林丈韻呈覃

溪師

鸞鵲天書向曉過。仙郎文思邁長河。蘇門詩格斜川好。劉氏經傳奉世多。侍直同看花影麗。退朝應羨佩聲和。他時伯仲聯翩上。會見壘篁一處歌。

大梁上畢大中丞四十韻

作弼邦屏翰惟良

帝股肱掌書周內史。持節漢中丞。若木卿雲麗扶桑。旭日升宮花圍紫綬官。餅宴紅綾天祿無雙選。慈恩第一層鳴珂。趨瑣闥珥筆侍觚稜。特簡宸心契分猷。

寵命膺九峴。方蒞止三輔。盡歡騰婦子。傳熙皞人文。慶蔚蒸溫如含璞。玉潔比在壺。冰昔者萑苻發。紛然羽檄仍指揮。謀自靜守禦。勢堪乘帳下。沾醪醴行間。挾纊繒叛蕃潛穴鼠。戰士脫鞬鷹隴坂。軍威壯秦關。喜氣凝奏功孚。

黼座移鎮過峭陵。豪右清兼併窮黎。給斗升煙含菽麥。

隴雨細稻花滕布帛家家足倉箱戶戶登河淮同瀨瀚
嵩室竝峻嶒瓠子流如帶桃花浪不興鈴轅虛請謁幕
府盛賓朋民被恩無覈人欽行有恒政聲元夙仰學術
更宜稱器與山俱重心隨水共澄儒林齊鄭服文苑壓
歐曾四海尊山斗諸生負笈簞疏經河北賈注史汝南
應訓詁今多誤聲音古可憑百家資考證六籍表師承
象緯殫心考輿圖悉力徵長編刪李燾事畧續王偁鉅
製千年貫雄辭萬手謄是非分黑白得失判淄澠大雅
誠誰竝鯁生敢自矜晨昏瞻白髮風雨愧青燈何幸親
顏色從茲得準繩叩鐘人寡學殫鍊客何能俛俯情無

極低回感不勝慚非鴻鵠翼願附九霄鵬

校禮堂詩集卷五

校禮堂詩集卷六

歎凌廷堪次仲撰

戊申

○杏花四首和方五子雲

細草初生柳未芽
梁園日日靜吹沙
東風信是多情甚
第一先開及第花

遲日扶春度遠林
晴霞幾疊護簾陰
有人小立花枝下
持取春衫較淺深

閒梅遮柳最溫柔
澹澹輕陰古渡頭
乍煖乍寒人夢醒
如絲春雨小紅樓

芳辰別院鶯能語亭午空階蝶欲來正是濃春好天氣
粉牆風細一枝開

秋帆中丞每歲十二月十九日置酒高會爲東坡

作生日丁未冬以病不果於戊申正月補爲之

同人各賦七言長句一章時在坐者吳竹嶼舍

人張吾山廣文唐柘田進土方子雲布衣洪稚

存博士徐朗齋孝廉朱秋巖明經沈春林上舍

王石華蕩夫二茂才也

去年六月客豫章辦香會祀分寧黃

去年夏隨覃溪師於南昌使署爲山

谷作生日今來輻輳大梁道盥手復爲公稱觴唯公嶽嶽人

中傑賦命何因困磨蠓中丞欲挽造化權故遣尊開孟

陬月公本紫府驂鸞仙游戲偶值熙豐年華嚴六十六

小劫初度強半皆南天東都雖好夢不到英惠瓊儋非

所好治平二年直史館元祐初元知制誥前後數載留

京華淋漓大筆紛天葩玉堂倡和誰第一好頭赤圖雙

井茶嵩陽吟館重開燕精爽知公此猶戀瓊筵小部列

笙歌不亞金蓮送歸院旃檀婆律雲一絲靈風雜沓來

無時湘梅半開月將上鬢鶴警凌雲姿翡翠蘭苕競

相語論詩向公公定許獨將健筆壓西崑不向江西作

初祖學古遺貌神自同餘子紛紛俱望風具茨流汗宛

邱走尊前祇許配涪翁

次洪稚存開封寒食日追憶舊游二十首元韻

客懷空對酒盈卮輕煖輕寒薄醉時
根觸舊游春最甚
鳴桃如繡柳如絲

擊筑曾尋燕市屠金臺芳草未全蘇
荆高去後酒徒少
空有好山如畫圖

衝煙雙槳欲何之小泊豐臺獨詠詩
仿佛西湖西畔路
畫船搖過水仙祠

瓊華島外綠迢迢拂馬迎人柳萬條
幾陣好風連夜雨
鷺黃遮斷玉河橋

高樹晴沙向午行
鷺臺與綠雲平游絲墮地澹無影
時有看花人出城

茸茸沙草細于苔
薄薄山桃豔比梅零落瘦金書幾字
披雲樓下野花開

如磬大道望中賒
淺白深紅夾路遮行過樓臺金粉地
茅檐近水兩三家

回眸一笑直千金
曾逐鈿車傍柳陰誰信金明池上路
春燈軟語又論心

旃檀小閣覆橫塘
靈琰低低祝淨光多謝箇儂真愛惜
幾時花送馬蹄香

雷塘煙月二年居放艇多乘細雨餘楊柳東偏蓮葉北
跳波潑刺一雙魚

湖光侵曉碧無涯藻影縱橫荇影斜八尺短篷三尺槳
白鷗波上是儂家

慈雲寶月印清池懺盡塵心禮導師顧影忽驚花滿袖
未除結習又題詩

樓名尺五望亭亭微露遙山幾疊青翡翠太濃雲太薄
都將芍藥作圍屏

黃鸝深樹影交交牆角新分翠半梢別有梧桐高百尺
拂雲留待鳳皇巢

尋春多傍海棠行薄莫歸來懶送迎坐到夜深窗弄影
澹紅猶在月中明

十年夢想刺初通雪苑談經幕府中他日春明門外路
與君同看杏花紅

眼中莫漫羨王郎青眼高歌大道旁深夜雨窗眠不穩
匣中雄劍吐奇光

擁鼻微吟日幾回清詩和罷苦低徊輪君一事真豪邁
手折蓮花嶽頂來

年年浪迹逐詞場說到江鄉夢亦忙孤負雙溪三畝宅
成團黃蝶菜花香

禊游漫賦麗人行蚤有新篇得意鳴不是方干詩句好
更誰佳句和淵明 謂子雲

固城店在栢鄉縣北爲古鄗城其南五里有光武
廟後漢書光武帝於鄗南卽皇帝位卽此地後
更名高邑非今之高邑縣也

河朔收銅馬雲興赤伏符皇哉規九有帝者奉三無尊
俎留高邑車書會下都何因崇讖緯代漢啓當塗

正定道中示沈八春林

新秋襍被向燕臺並轡論心亦快哉恒岳似龍仍北拱
虜海如馬自西來山川到眼俱增色風雅逢君未易才

莫漫驅車重懷古亂鴉飛盡暮雲開

戊申出都留別胡大樹思牛四次原

我作京洛游得交兩丈夫次原佳公子翩翩美且都胸
次隘九州復有吾鄉胡共飲燕市傍醉卽同歌呼深感
次原賢獨闢屋一區招我與胡君下帷晨夕俱几席互
切磋骨肉情不殊豈無偶乖迕性分終難渝市樓朝聽
歌塵榻夜讀書佔畢宵苦飢殘粥搜空廚熱釜手自烹
辛苦還相娛富貴慎勿忘此語良非誣是時君家人竊
竊譏狂愚名父丈人行自足知吾徒時時相勞苦擊鼓
吹笙竽丙午君二人奮步升天衢唯我獨垂翅落拓歸

江湖逾歲我北上一擊中副車所得不償勞有若食小
魚行將歸養親南發騎疲驢二君送我行尊酒置路隅
上言加餐飯下言慎起居男兒當別離何事空踟躕元
冬澤乾源雨雪行載塗轉盼重來時萬彙當蘇蘇大道
直如苜芳草鋪氍毹握手寶釵樓一笑雙眉舒策馬聯
轡行花下傾百壺

己酉

牛揮雲太守宜石假山

憑誰鑿破碧孱顏萬里飛來几席間有客袖中曾納海
何人夜半解持山浮嵐隱見宜相對曲逕紆迴未許攀

底事踏雲誇汗漫居然五嶽片時還

○孫淵如以編修散館改官刑部却寄

鑿坡曾直鷺鷥行又佩西曹比部章我道經師慵作賦
誰云才子例爲郎著書未礙尋公穀讀律何妨合老莊
贏得詞林增掌故謫官猶許向人狂

○聞阮伯元館選之信

咫尺瀛洲路君登最上頭乍聞天畔信頓解客中愁紫
陌聯今雨青燈憶舊游江關蕭索春過尚淹留

題汪處士印譜

先秦繆篆易以石此法始自王元章多君筆如莫邪利

能使字作珊瑚光壽承雪漁非駿足李斯史游真雁行
他日摩厓需鉅手不容更作善刀藏

上學使秦端厓先生己酉榜後作

持衡京兆拔孤寒未見先邀國士看鑑別精嚴公輩少

文章遇合古來難戊申鄉試先生分校北闈見予文與莊公通敏其相激賞深以南人例不

闕南卷曾勞匠石施斤斧敢向秋風振羽翰寄語江鄉為惜

舊儔侶托身須傍五雲端

庚戌

次韻覃溪師獻縣道中見懷之作

小小耕海濱但知麻菽麥治經力作暇伊吾記疇昔心

虞無授受慨焉事行役齊魯既經過燕趙復游歷欣於

絳帷下山斗敬初覲提撕勞精神指畫費心力三傳異

文辯五禮疑義析著錄羣弟子一一遞相識睽離已三

年寤寐依几席低徊古今情繾綣風雨夕誦讀所未安

胸腹久堆積會當軒車來展卷日請益

獻縣道中寄懷端林敬堂仲子蘭臺吳齋

大典 翁方綱 覃谿

驅車獻王宮改火及新麥倦言汲古心何以申在昔

憑眺值初陽繾綣忝行役原卉俱靡靡館基猶厯厯

四禮意可稽三雍面如覲卓爾大雅人艱哉補遺力

後來哀輯家奚自經傳析千年溯師承前哲想多識
邇日同心友幾得共留席江干擷蘭芷菊北埭晨夕
暮雲林埃轉芳月煙景積舊夢勞中宵心知望三益

會試聞捷作

平明飛騎出天閭一紙紅牋姓字香自是羣公精藻鑒
非關賤子善文章宵黎敢擬臨東觀春草還欣慰北堂
憶否黃籛十年夢短繁風雨讀書牀

四月十八日

正大光明殿覆試恭紀

魚鑰沉沉曉漏催褐衣

詔許入蓬萊未含雞舌簪花立先向螭頭視草回日影
乍高雙闕迴

天顏初近五雲開幸叨朱紱眞非分敢詡長楊作賦才

懷舊詩四首

故禮部尚書座主德定圃先生

我師河嶽精蔚爲

昭代光十九成進士抗志登巖廊中外五十載經濟兼
文章公事

國史書不必俟表揚孤生知己恩感激何時忘昔在著
雍歲獻策京兆堂爲文太驚俗聊發胸中藏本非趨媚

媚謗議庸何傷時公典文衡擊節喜欲狂謂此雕鶚姿
百鳥不敢望嗜好與世殊按劍爭短長公非狗衆論厚
意固難量稍稍加琢磨要令成圭璋抑之置副車猶勝
棄道傍榜發我謁公慰藉非尋常騏驥或要駕雲路終
騰驤是冬我南歸明年舉於鄉北應禮部試榜射天街
黃公已騎箕尾不得依門牆再拜奠公酒涕淚沾衣裳

故翰林院編修程戢園先生

我初入京師逐逐肥馬塵感君一見我許我觀國賓爲
我謀一枝不憂長安貧君家本素封獨與逢掖親黃金
信手盡非爲營一身廣厦大布裘寒士忘艱辛修髯一

尺餘談笑超羣倫平生所爲詩豈讓唐宋人壓囊千萬
篇韓杜蘇黃陳老作吏部郎馬骨高嶙峋

詔修石渠書特改侍從臣似此稽古榮亦足垂千春別
君未經年聞君西走秦擬緘尺素書遠托黃河鱗忽傳
君信來客死渭水濱傷哉不復見西望驚心神隻雞路
阻修懷抱何能申慰君君莫悲君息真石麟他年讀父
書天路揚通津作善必獲報至理寧無因

○ 故陝西道監察御史任幼植先生

當世博洽儒首推吾郡戴先生與之友淵源固有在三
禮浩煙海學者任沾漑精心釋雜服拔戟成一隊考古

研六書注史搜五代學深矜張盡虛衷益謙退公餘陪
燕閒屢得接清誨開尊羅酒漿堆盤雜鮭菜藹藹欽和
平英英見節槩在廷特薦舉校書天祿內共事者數公
袞袞貂玉佩先生冷閉門寂寞仍故態浮沉郎署間奄
忽十餘載一朝著薦冠天下望風采何期游玉京有志
竟未逮弱弟扶襯南妻孥慘相對清節乃無後鬼神何
憤憤緬懷夙昔情真摯適時輩寢門未遑哭椒漿向空
酌千古信必傳斯人不可再

故順德府知府洪素人先生

欽州盛文物巨擘稱三洪君在兄弟行譽望尤隆隆摘

藻

玉皇案作賦聲摩空孤操潔於冰匪獨文章雄受

命校楚士所拔多宗工至今漢水上庠序歌清風賤子

京洛游潦倒如寒蟲感君分俸錢令我囊橐充君出守

順德邀我使與同時將試京兆未及酬深衷無何君卒

官素旆歸江東撫懷不能止雨涕時冥濛中間走荆豫

魂夢無由通庚戌我驅車應試春闈中得與貴介弟同

日登南宮握手道故舊悽惻心忡忡君歿已七稔宿草

應蒙寵善人不永年遇嗇名必豐他年竹帛上聲聞垂

無窮文苑循吏間定論自有公

神仙

神仙居蓬萊白玉為階廷巍峩金銀臺照耀珊瑚屏仙
娥衣六銖丹頰長眉青下方蟣蝨臣耳目所未經木立
手指口悄悄心靡寧呼虎使鼓瑟屏息不敢聽妄指為
妖怪播弄其精靈嗚呼糞壤徒沉溺何時醒

歸舟雜詩十六首

刻楮三年事竟成自憐辛苦太憨生春風絳帳情何限
知己生平兩北平受業翁覃溪師
座主朱石君師
注目寒江一笑中紛紛得失競雞蟲後宮亦有良家子
羞把黃金買畫工

研經稽古最宜人載酒評花事亦新同學少年俱好在

孫郎憔悴阮郎貧

端如刑部
伯元編修

籍甚奇章奕葉孫翩翩安定舊清門從今風雨評千古

尊酒何人與細論

牛次原胡樹
思雨孝廉

廣渠門畔柳絲柔彌望新禾綠乍抽五十里中塵不斷

小車纜卸又登舟

人家夾岸屋參差樓上新樅門畫眉紫鱗黃魚都入市

津門五月泊船時

簡絮經流互異同九河故道盡成空秋風瓠子河南徒
漳水滔滔日向東

德州城外水按藍侵曉乘風又挂帆記得故人同襪破

塵沙如雨打征衫癸卯丙午兩借胡大樹思出都均由陸路取道德州

平田兩足豆花腴小艇斜陽晚曬罾鴻雁不知鈎黨事

也分南北過甘陵

濁衛茫茫下遠灘汶流清淺澹生瀾可憐牖裏盈盈水

出牖難同在牖看

朱旗畫楫繞城來十里傳呼喚牖開誰向荒原等玉貌

蓼花紅徧射書臺

汶流南北此分趨稅稻三吳玉不如畢竟河渠功利溥

荒祠猶祀宋尙書

高樓上與白雲連把酒臨風酌謫仙樓上題詩無客賞

憑誰喚起李青蓮

艾山陪尾導源來想見當年費決排莫按圖經徵禹蹟

泗沂久已不通淮

兩月蓬窗百慮刪篙師懶卧舵工閒好風忽送泃河棹

望見江南一角山

風塵十載走東西水驛山程記雪泥會買江鄉田二頃

侵晨視膳暮扶犁

杉禮堂詩集卷六

校禮堂詩集卷六

